

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI ISNIN : 30 NOVEMBER 2020

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 52)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 30 NOVEMBER 2020 (ISNIN)

SOALAN

TUAN CHE ALIAS BIN HAMID [KEMAMAN] minta **MENTERI ALAM SEKITAR DAN AIR** menyatakan pelan tindakan yang komprehensif dengan rancangan penubuhan Unit Jenayah Alam Sekitar.

JAWAPAN

Tuan Yang Di-Pertua,

1. KASA memohon supaya soalan ini dijawab bersekali dengan soalan YB Petaling Jaya pada 9 Disember 2020 berkenaan isu yang sama.
2. Bagi menyelaraskan tindakan lebih berkesan ke atas penjenayah alam sekitar termasuk pencemaran sumber air, KASA telah menubuhkan Unit Cegah Jenayah Alam Sekitar (UCJAS) yang mula beroperasi secara pentadbiran pada 1 Oktober 2020. Justeru, di dalam usaha memperkasakan penguatkuasaan Akta Kualiti Alam Sekeliling 1974 dan membendung pencemaran alam sekitar, Unit Cegah Jenayah Alam Sekitar ditubuhkan dengan tujuan seperti berikut:
 - (i) memantapkan penyiasatan sedia ada melalui pendekatan risikan dan kaedah forensik;
 - (ii) menjadi pusat pengumpulan maklumat dan data bagi jenayah alam sekitar dalam membantu siasatan pencemaran;

NO. SOALAN : 11

- (iii) mencegah, membanteras dan membendung kejadian pencemaran alam sekitar; dan
- (iv) mempercepatkan tindak balas siasatan, dan mengambil tindakan undang-undang.

3. Pada masa ini, KASA mengguna pakai perjawatan dan peruntukan sedia ada dengan kerjasama Polis Diraja Malaysia (PDRM). Menurut anggaran KASA, sejumlah 50 pegawai tambahan adalah diperlukan yang akan ditempatkan di setiap negeri bagi mengagotai UCJAS ini. Secara keseluruhan, UCJAS akan melibatkan penempatan pegawai penguat kuasa daripada Jabatan Alam Sekitar (JAS), Suruhanjaya Perkhidmatan Air Negara (SPAN) dan Jabatan Biokeselamatan. Unit ini akan bekerjasama dengan PDRM daripada aspek kepakaran siasatan, risikan dan forensik.

4. Penubuhan Unit Cegah Jenayah Alam Sekitar ini adalah sebagai langkah tambahan bagi penguatkuasaan sedia ada, yang bertujuan mencegah, membanteras dan membendung kes-kes pencemaran alam sekitar. Sehingga kini, keanggotaan unit ini adalah terdiri daripada Jabatan dan agensi di peringkat persekutuan sahaja iaitu JAS, PDRM, SPAN dan Jabatan Biokeselamatan.

5. Walau bagaimanapun, pihak-pihak berkenaan seperti Pihak Berkuasa Tempatan, Lembaga Hasil Dalam Negeri, Jabatan Imigresen Malaysia, Tenaga Nasional Berhad dan sebagainya akan turut dilibatkan dalam operasi yang dilaksanakan sekiranya diperlukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN GOBIND SINGH DEO (PUCHONG)

TARIKH : 30 NOVEMBER 2020 (SELASA)

SOALAN

TUAN GOBIND SINGH DEO [PUCHONG] minta **MENTERI DALAM NEGERI** menyatakan apakah cadangan dan status pindaan kepada Akta Kesalahan Keselamatan (Langkah-Langkah Khas) 2012 (SOSMA) dan bilakah ia akan dibentangkan di Dewan Rakyat.

JAWAPAN

Tuan Yang Di Pertua,

Kerajaan berpandangan bahawa Akta Kesalahan Keselamatan (Langkah-Langkah Khas) [Security Offences (Special Measures) Act, SOSMA] 2012 masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang sedemikian bagi membanteras dan membendung ancaman-ancaman keselamatan seperti pengganas dan juga sindiket jenayah terancang.

Walaupun begitu, Kementerian komited untuk menambahbaik undang-undang keselamatan tersebut dari semasa ke semasa bagi memastikan keamanan dan keselamatan Negara sentiasa terpelihara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE EMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan pelan transformasi nelayan zon A kepada zon B, C dan C2 serta langkah-langkah menggalakkan tekong dan pemilik bot B, C dan C2 di Kawasan Pantai Barat adalah di kalangan warganegara Malaysia.

JAWAPAN

Tuan Yang di-Pertua,

1. Untuk makluman Ahli Yang Berhormat, dalam Rancangan Malaysia Kedua belas (RMKe-12), Kementerian melalui Jabatan Perikanan Malaysia (DOF) telah merangka pelan transformasi nelayan zon A kepada zon B, C dan C2 melalui Program Pemodenan Vesel dan Mekanisasi Tangkapan. Program ini dijangka dapat menggalakkan nelayan tradisional zon A untuk bertukar kepada vesel fiber yang lebih moden dan selamat atau menukar peralatan menangkap ikan kepada peralatan yang moden dan mesra sumber.
2. Bermula tahun 2021, Program Pemodenan Vesel telah diperuntukan sebanyak RM100 juta yang akan ditawarkan dalam bentuk pinjaman kepada pengusaha/pemilik vesel melalui Agrobank

pada kadar 3.5% (*flat rate*). Pinjaman ini juga terbuka kepada pemilik/pengusaha vesel yang berminat untuk bertukar zon yang lebih jauh iaitu dari zon B kepada zon C dan C2 (laut dalam). Sebanyak RM50 juta juga telah diperuntukan bagi Program Mekanisasi dan Automasi Perikanan Tangkapan dalam bentuk geran padanan.

3. Kebergantungan kepada tenaga kerja asing merupakan salah satu cabaran dalam sektor perikanan laut dalam di Malaysia kerana persepsi bahawa sektor ini adalah 3D iaitu kotor, berbahaya dan sukar. Bagi mengatasi masalah ini, pemilik vesel laut dalam dibenarkan antara lain untuk menggajikan tekong/kru warganegara asing untuk bekerja di atas vesel penangkapan ikan tempatan. Dari segi pemilikan vesel, ianya dimiliki sepenuhnya oleh rakyat tempatan.

4. Dalam usaha menggalakkan penggunaan tekong tempatan khususnya di Pantai Barat, Kerajaan akan meneliti beberapa cadangan baharu setelah sesi libat urus bersama *stakeholders* diadakan untuk menilai kebolehlaksanaan cadangan tersebut antaranya:

- i. meneruskan usaha sedia ada dalam memperkenalkan gaji minimum dan komisyen berdasarkan hasil tangkapan;
- ii. menyediakan kemudahan asas di atas vesel seperti tandas dan bilik tidur bagi keselesaan kru tempatan melalui pemodenan vesel;
- iii. insentif/pegecualian cukai kepada pengusaha/syarikat bagi menggalakkan penggunaan kru warganegara atau pelajar akademi atau kolej perikanan; dan
- iv. meneruskan inisiatif untuk menaiktaraf pusat latihan dan peralatan kapal dan latihan kapal sedia ada.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 30 NOVEMBER 2020 (ISNIN)

SOALAN

DATIN PADUKA DR. TAN YEE KEW [WANGSA MAJU] minta
MENTERI WILAYAH PERSEKUTUAN menyatakan :-

(a) apakah status pelaksanaan projek perumahan Residensi Prihatin dan Rumah Prihatin Wilayah seperti diumumkan oleh Menteri Wilayah pada bulan Mei; dan

(b) apakah perkembangan cadangan untuk menyemak semula projek-projek perumahan RUMAWIP dan Residensi yang sedang dijalankan.

JAWAPAN (a)

Tuan Yang Di Pertua,

Untuk makluman Yang Berhormat Wangsa Maju, pihak Kementerian Wilayah Persekutuan (KWP) telah mengenalpasti lokasi yang berpotensi untuk cadangan pembangunan Residensi Prihatin dan dalam proses mendapatkan kelulusan Jemaah Menteri sebelum pelaksanaannya dalam masa terdekat.

Sehingga kini, sebanyak 326 unit telah diserahkan kepada penerima terpilih sejak pelaksanaannya bermula tahun 2016.

Sekian, terima kasih.

JAWAPAN (b)

Untuk makluman Ahli-ahli Yang Berhormat jua, KWP jua masih meneruskan projek-projek Residensi Wilayah berharga sehingga RM300,000 sedia ada yang mensasarkan golongan berpendapatan sederhana M40 dan dalam perancangan untuk melaksanakan program Residensi Prihatin berharga sehingga RM200,000 yang mensasarkan golongan berpendapatan rendah B40.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 30 NOVEMBER 2020 (ISNIN)

SOALAN

TUAN LUKANISMAN BIN AWANG SAUNI [SIBUTI] minta **MENTERI KESIHATAN** menyatakan apakah perancangan Kementerian mengenai naik taraf atau gantian penuh klinik Tun Abang Haji Openg Simpang Bekenu dan Klinik Ladang 3 yang kini dalam keadaan daif.

JAWAPAN

Tuan Yang di-Pertua,

1. Klinik Kesihatan Tun Abang Haji Openg merupakan Klinik Kesihatan jenis 5 yang beroperasi sejak tahun 1972 dan memberikan perkhidmatan kepada lebih 11,130 orang di lokaliti tersebut. Perkhidmatan yang disediakan termasuk Jabatan Pesakit Luar, Kesihatan Ibu dan Anak, Perkhidmatan Farmasi dan juga makmal perubatan. Jumlah kehadiran pesakit untuk mendapatkan rawatan di KK Tun Abang Haji Openg adalah sebanyak 116 pesakit sehari.

2. KKM sedia maklum akan keadaan fasiliti yang memerlukan penambahbaikan. Oleh yang demikian, pada tahun 2019, **KKM telah menambah baik kemudahan sedia ada seperti mewujudkan fasiliti makmal di dalam klinik dan membuat pendawaian semula bangunan**

klirik. Manakala pada tahun 2017 dan 2016, **kerja-kerja menukar lantai, tingkap, jaring kuarters dan mengecat keseluruhan bangunan klinik telah dilaksanakan**.

3. Klinik Kesihatan Ladang Tiga pula merupakan KK jenis 6 yang telah beroperasi sejak tahun 1977. Ia memberi khidmat kepada 6,082 penduduk sekitar. Antara perkhidmatan yang disediakan adalah termasuk Jabatan Pesakit Luar, Kesihatan Ibu dan Anak, Perkhidmatan Farmasi dan juga makmal perubatan. Jumlah pesakit yang hadir untuk mendapatkan rawatan adalah sekitar 65 orang sehari.

4. **Kerja-kerja pembaikan seperti mewujudkan makmal dan pendawaian bangunan klinik** juga telah dilaksanakan di KK Ladang Tiga. Selain itu, KKM juga mempunyai perancangan untuk **menambahbaik ruang Jabatan Pesakit Luar termasuk ruang menunggu pesakit di KK Ladang Tiga**.

5. Dengan kerja-kerja yang telah dilaksanakan dan juga dalam perancangan, KKM berpandangan kedua-dua fasiliti sedia ada ini masih dapat menampung keperluan setempat.

6. KKM sememangnya sentiasa memantau keadaan semua fasiliti kesihatan bagi memastikan ia selamat dan dapat berfungsi dengan baik. Pasukan teknikal daripada Pejabat Kesihatan yang terdiri daripada jurutera dan penolong jurutera akan membuat pemeriksaan di setiap klinik kesihatan sekurang-kurangnya sekali setahun. Pemantauan ini akan terus dilakukan bagi memastikan klinik kesihatan dalam keadaan yang selamat dan selesa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HANNAH YEOH TSEOW SUAN
[SEGAMBUT]**

TARIKH : 30 NOVEMBER 2020 (ISNIN)

SOALAN

PUAN HANNAH YEOH TSEOW SUAN [SEGAMBUT] minta **MENTERI ALAM SEKITAR DAN AIR** menyatakan statistik kilang yang beroperasi sama ada secara sah dan secara haram di sepanjang sungai-sungai di Wilayah Persekutuan dan di Selangor, sistem pemantauan sedia ada, langkah pencegahan dan rancangan penempatan semula kilang-kilang tersebut supaya pencemaran air sungai tidak berulang.

JAWAPAN

Tuan Yang Di-Pertua,

1. Jabatan Alam Sekitar (JAS) menjalankan penguatkuasaan secara berkala ke atas kilang-kilang yang tertakluk di bawah Akta Kualiti Alam Sekeliling 1974. Selain daripada penguatkuasaan di lapangan, JAS juga mengambil tindakan-tindakan berikut bagi memastikan kilang-kilang berkenaan mematuhi sepenuhnya AKAS 1974 dan peraturan-peraturan di bawahnya iaitu:

- i. Kilang yang menghasilkan efluen perlu melaksanakan pengawasan prestasi sistem pengolahan efluen yang merangkumi pengawasan setiap unit operasi sistem, percontohan parameter utama, percontohan di takat pelepasan akhir, merekod kualiti pelepasan setiap minggu dan

NO. SOALAN : 16

melaporkan kepada JAS secara dalam talian serta mempunyai orang yang berwibawa untuk mengawasi operasi sistem pengolahan efluen;

- ii. Melakukan program penguatkuasaan secara berfokus kepada industri yang mempunyai risiko untuk menyebabkan pencemaran melalui pelaksanaan operasi khas seperti Ops Gempur;
- iii. Melaksanakan operasi bersepadu yang melibatkan pelbagai agensi penguatkuasaan ke atas punca yang dikenalpasti bermasalah;
- iv. Melaksanakan program dan kempen kesedaran kepada pihak kilang bagi meningkatkan tahap kesedaran mereka terhadap kepentingan penjagaan alam sekitar;
- v. Mengambil tindakan undang-undang di atas ketidakpatuhan yang dikesan semasa siasatan penguatkuasaan dilakukan;
- vi. Mengemukakan maklumat mengenai operasi kilang haram yang dikenalpasti semasa siasatan penguatkuasaan JAS kepada Pihak Berkuasa Tempatan untuk tindakan selanjutnya; dan
- vii. Melaksanakan konsep Total Maximum Daily Load (TMDL) dalam mengawal pencemaran air.

Sekian. Terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD TARMIZI BIN SULAIMAN [SIK]

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan apakah tindakan Kementerian untuk memastikan bekalan makanan rakyat mencukupi khususnya pada tempoh pasca Perintah Kawalan Pergerakan (PKP) dan gelombang ketiga COVID-19 khususnya di kalangan para petani, penternak dan nelayan.

JAWAPAN

Tuan Yang Dipertua,

1. Untuk makluman, Kementerian Pertanian dan Industri Makanan (MAFI) mempunyai peranan yang sangat penting dalam memastikan bekalan makanan bagi rakyat khususnya di kalangan para petani, penternak dan nelayan adalah mencukupi bukan sahaja pada tempoh pasca Perintah Kawalan Pergerakan (PKP) atau gelombang ketiga COVID-19 malahan dalam apa jua keadaan.
2. Antara tindakan yang diambil oleh MAFI untuk memastikan bekalan makanan rakyat mencukupi adalah termasuk:
 - (i) Meningkatkan stok penimbal beras (stokpail) bagi memastikan bekalan beras sentiasa terjamin di mana BERNAS menyimpan dan

SOALAN NO : 17

mengurus stokpail sedia ada iaitu sebanyak 150,000 tan metrik. Dalam hubungan ini, BERNAS telah diminta untuk menambah jumlah stokpail sebanyak 140,000 tan metrik menjadikan keseluruhan stokpail berjumlah 290,000 tan metrik;

- (ii) Meningkatkan bekalan beras daripada pelbagai sumber import daripada negara luar seperti Pakistan dan India;
- (iii) Merencanakan aktiviti pengeluaran makanan dan meningkatkan produktiviti dengan pemberian subsidi / insentif input dan penyediaan khidmat nasihat teknikal;
- (iv) Menyediakan prasarana, kemudahan logistik dan pengangkutan bagi membantu aktiviti pengumpulan hasil dan pemasaran seperti pasar tani dan nelayan, pusat pengumpulan dan pengedaran serta lori sejuk beku;
- (v) Memastikan kesinambungan pengeluaran melalui *Buy Back Scheme* bagi memastikan beberapa bahan makanan terpilih mempunyai bekalan yang terjamin dengan harga yang berpatutan kepada pengguna; dan
- (vi) Memperluas akses pasaran pengusaha tani melalui outlet pemasaran seperti pasar tani, pasar nelayan, Agrobazaar dan MyFarmOutlet serta menggalakkan penyertaan usahawan dalam platform e-dagang seperti Agrobazaar Online, NEKMATBIZ dan platform kerjasama strategik dengan pihak swasta seperti Lazada dan Shopee.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN
MD. RAMLI [LUMUT]**

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan apakah terdapat usaha pihak Kementerian bagi memerdekakan golongan nelayan dari belunggu subsidi dan bantuan sara hidup.

JAWAPAN

Tuan Yang di-Pertua,

1. Untuk makluman, Kementerian Pertanian dan Industri Makanan (MAFI) melalui Jabatan dan Agensi sentiasa berusaha untuk memerdekakan golongan nelayan dari belenggu subsidi dan bantuan sara hidup. Bagi tujuan ini, antara mekanisme dan program untuk meningkatkan pendapatan nelayan serta mengurangkan kebergantungan terhadap subsidi dan bantuan adalah seperti berikut:

- i. Program Pembangunan Akuakultur iaitu bantuan seperti peralatan, makanan serta pembekalan benih ternakan secara *in-kind* kepada nelayan yang menceburi ternakan akuakultur sebagai pendapatan sampingan;
- ii. Memperluaskan kaedah pemasaran ikan secara *online* melalui platform Shopee dan NEKMATBIZ, manakala pembinaan Pasar Nelayan untuk memberi peluang kepada nelayan memasarkan hasil tangkapan secara terus kepada pengguna;
- iii. Program My Komuniti Perikanan (MyKP) iaitu bantuan peralatan akuakultur, unjam, bantuan kabin, kiosk jualan ikan, alatan keselamatan nelayan dan alat pengendalian ikan yang disediakan kepada komuniti nelayan (secara berkelompok);
- iv. Bantuan pinjaman tanpa faedah melalui Dana Nelayan bagi pembelian bot *fiberglass*, kotak ikan berinsulasi atau peralatan penangkapan ikan yang berteknologi baru; dan
- v. Program Pembangunan Kumpulan Nelayan Belia dan Wanita (KUBINA dan KUNITA) yang menjalankan aktiviti pemprosesan makanan berasaskan perikanan, bantuan disediakan dalam bentuk modal, peralatan dan khidmat nasihat bagi memperkasakan sosio-ekonomi keluarga nelayan.

- vi. Program Sijil Kemahiran Malaysia (Perikanan Tangkapan) dan Program Sijil Perikanan di Kolej Perikanan Sultan Nazrin Shah bagi melahirkan tenaga kerja (belia) yang berkemahiran dan berdaya saing dalam bidang perikanan;
- vii. Program Usahawan Bimbingan melalui penyediaan khidmat nasihat dan latihan antaranya Kursus Pemprosesan Hasil Otoshimi; Persijilan MESTI dan Halal; Pembungkusan dan Penjenamaan; Kewangan dan Akaun; Bina Minda dan Transformasi Nelayan; dan
- viii. Di bawah RMKe-12, sebanyak RM150 juta telah diperuntukkan bagi Program Pemodenan Vesel dan Mekanisasi Tangkapan iaitu bantuan dalam bentuk pinjaman melalui Agrobank pada kadar 3.5% (*flat rate*). Program ini bertujuan untuk menggalakkan nelayan tradisional sampan bertukar kepada vesel fiber yang lebih moden dan selamat ataupun menukar peralatan menangkap ikan kepada peralatan yang moden dan mesra sumber.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 30 NOVEMBER 2020 (ISNIN)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI KESIHATAN** menyatakan apakah langkah Kementerian untuk membolehkan 'swab test' COVID-19 diakses oleh semua golongan terutama kumpulan B40 supaya mereka tidak dibebani dengan kos yang tinggi bagi menjalankan saringan sama ada bergejala atau tidak.

JAWAPAN

Tuan Yang di-Pertua,

1. Sehingga 22 November 2020, kumulatif kes positif COVID-19 di Malaysia adalah seramai 54,775 orang. Jumlah tersebut merupakan sebahagian dari sejumlah 2,528,158 individu yang telah diambil sampel, menjadikan kadar positif dalam kalangan mereka yang telah disaring adalah sejumlah 2.17%.
2. Ujian saringan yang dilaksanakan tidak hanya terhad kepada golongan *Patient Under Investigation* (PUI) atau kontak-kontak rapat kepada kes positif yang dikesan melalui pengendalian kluster di lapangan sahaja. Kes sporadik turut dikesan dalam kalangan golongan *Person Under Surveillance* (PUS) mahupun dari aktiviti surveilan COVID-19 yang melibatkan tiga (3) kategori – iaitu orang awam yang mengunjungi fasiliti kesihatan yang

dikenalpasti sebagai lokasi-lokasi sentinel, petugas perubatan dan kesihatan serta dalam kalangan pesakit sejurus sebelum menjalani prosedur pembedahan.

3. Melalui pelbagai aktiviti saringan yang dijalankan ini, didapati kadar positif yang diperolehi dalam kalangan *Patient Under Investigation* (PUI) atau kontak-kontak rapat kepada kes positif yang dikesan melalui pengendalian kluster di lapangan adalah lebih tinggi berbanding kadar positif yang diperolehi dari aktiviti surveilans COVID-19 iaitu 2.47% berbanding 0.23%.

4. Pendekatan saringan secara bersasar digunakan khususnya melibatkan kontak rapat kes COVID-19 yang dikesan di lapangan dan dalam kalangan individu yang didapati memenuhi kriteria sebagai golongan berisiko tinggi. Ujian makmal yang dijalankan terhadap golongan yang dikenalpasti **melalui aktiviti saringan secara bersasar ini tidak dikenakan sebarang caj.** Pendekatan ini digunakan bagi memastikan pengurusan sumber yang berkesan, mengambilkira keupayaannya untuk memaksima keberhasilan daripada aktiviti yang dilaksanakan.

5. Pemeriksaan 'Swab test' COVID-19 **bukanlah suatu perkara rutin yang perlu dijalani oleh setiap anggota masyarakat, termasuklah bagi individu dari kumpulan B40.** Ujian ini sebaiknya dilaksanakan apabila terdapat indikasi yang kukuh untuk berbuat demikian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
(BATU KAWAN)**

TARIKH : 30 NOVEMBER 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan apakah status pemansuhan Akta Hasutan 1948, Akta Rahsia Rasmi 1972, Akta Mesin Cetak dan Penerbitan 1964 dan Seksyen 233 Akta Komunikasi dan Multimedia 1998 serta bilangan kes dalam siasatan, dakwaan dan sabitan dan usaha untuk menggantikan akta-akta ini dengan undang-undang yang lebih saksama dan progresif.

JAWAPAN

Tuan Yang Di Pertua,

Untuk makluman Yang Berhormat, jawapan yang akan diberikan adalah bagi akta yang dibawah bidang kuasa Kementerian ini iaitu Akta Hasutan 1948 dan Akta Mesin Cetak dan Penerbitan 1964 sahaja. Kerajaan berpandangan bahawa kedua-dua akta berkenaan masih relevan dan penting bagi memelihara ketenteraman awam dan keselamatan negara. Polis Diraja Malaysia (PDRM) masih memerlukan undang-undang sedemikian agar tindakan segera boleh diambil untuk mengelakkan perselisihan dan rusuhan kaum. Walaupun begitu, Kementerian komited untuk menambahbaik undang-undang tersebut dari semasa ke semasa bagi memastikan keamanan dan keselamatan Negara sentiasa terpelihara.

Di peringkat penguatkuasaan undang-undang, bilangan kes di bawah Akta Mesin Cetak dan Penerbitan 1964 adalah satu (1) kes bagi tahun 2019 dan kes berkenaan telah dituduh di mahkamah.

Bagi bilangan kes-kes berkaitan media sosial pada tahun 2020 (Januari hingga 30 September), sebanyak 600 kertas siasatan telah dibuka dan 42 darinya telah dituduh. Kesemua kes berkenaan ini disiasat di bawah Kanun Keseksaan, Seksyen 233, Akta Komunikasi dan Multimedia 1998 dan Akta Hasutan 1948.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 30 NOVEMBER 2020 (ISNIN)

SOALAN

PUAN WONG SHU QI [KLUANG] minta **MENTERI ALAM SEKITAR DAN AIR** menyatakan negeri-negeri yang telah melaksanakan caj 20 sen bagi beg plastik sekali guna menurut Pelan Hala Tuju Sifar Penggunaan Plastik Pakai Buang 2018-2030 dan negeri-negeri yang belum melaksanakan inisiatif tersebut.

JAWAPAN

Tuan Yang Dipertua,

Untuk makluman Ahli Yang Berhormat,

1. Pelan Hala Tuju Malaysia ke arah Sifar Plastik Sekali Guna 2018-2030 telah diperkenalkan pada 17 Oktober 2018. Salah satu pelan tindakan di bawah Pelan Hala Tuju ini adalah pengenalan caj pencemaran minimum 20 sen kepada pengguna bagi setiap beg plastik yang diperolehi dari premis-premis perniagaan.

2. Kementerian telah mengadakan beberapa sesi libat urus bersama semua kerajaan negeri dan wakil Pihak Berkuasa Tempatan (PBT) bagi mengenalpasti sejauh mana inisiatif pengenaan caj 20 sen ini telah dilaksanakan di peringkat negeri. Kerajaan Negeri Pulau Pinang telah memperkenalkan caj pencemaran ini lebih awal iaitu melalui Kempen Hari

Tanpa Beg Plastik sejak tahun 2009. Manakala negeri Selangor pula telah mengenakan caj pencemaran bermula Januari 2020. Selain itu, Wilayah Persekutuan pula telah melaksanakan larangan penggunaan beg plastik berasaskan petroleum dan mengenakan caj 20 sen ke atas beg kitar semula sejak 15 Mac 2019.

3. Kementerian juga telah menyediakan kertas pertimbangan bagi kelulusan Mesyuarat Majlis Negara bagi Kerajaan Tempatan ke-76. Tujuan kertas pertimbangan ini adalah untuk menyelaraskan dan menyeragamkan pelaksanaan pencemaran di peringkat negeri. Bagi negeri-negeri yang belum mengenakan caj pencemaran ini, mereka diberi masa sehingga akhir tahun 2021 untuk berbuat sedemikian, bergantung kepada kesediaan kerajaan negeri dan pihak berkuasa tempatan.

4. Kementerian sedar bahawa kempen dan sesi libat urus yang berterusan dengan semua pihak amat penting dalam memastikan kejayaan Pelan Hala Tuju ini. Oleh yang demikian, Kementerian dengan kerjasama rakan strategik dari pelbagai pihak termasuk kementerian, agensi, pihak industri dan badan bukan kerajaan akan terus melaksanakan program-program kesedaran awam untuk membudayakan amalan menghindari plastik sekali guna di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SERI DR. WAN AZIZAH WAN ISMAIL
[PANDAN]**

TARIKH : 30 NOVEMBER 2020 (ISNIN)

SOALAN

YB DATO' SERI DR. WAN AZIZAH WAN ISMAIL [PANDAN] minta **MENTERI SUMBER MANUSIA** menyatakan setakat Ogos 2020, kadar pengangguran kekal 4.7%. Angka ini dijangka akan meningkat pada hujung tahun ini. Apakah usaha kerajaan untuk menambah peluang pekerjaan di keseluruhan sector-sektor ekonomi.

JAWAPAN

Tuan Yang di-Pertua,

Untuk makluman Ahli Yang Berhormat,

1. Kadar pengangguran 4.7% yang di sebut oleh YB Pandan merupakan kadar pengangguran pada bulan Ogos 2020. Kadar ini merupakan penurunan daripada kadar 5.3% pada bulan Mei 2020.
2. Kerajaan telah memberi perhatian terhadap isu kebarangkalian kadar pengangguran akan meningkat dari awal Perintah Kawalan Pergerakan (PKP) dan telah memperkenalkan beberapa siri inisiatif untuk membantu mengurangkan beban industri dan menjamin kelangsungan pekerjaan bagi

tenaga kerja Malaysia seperti Pakej Rangsangan Ekonomi dan Pelan Jana Ekonomi Negara (PENJANA).

3. Antara inisiatif yang diperkenalkan adalah terdiri daripada **lima (5) inisiatif PENJANA berkaitan sumber manusia**. Pertama, **Program Subsidi Upah** merupakan bantuan kewangan yang dibayar kepada majikan setiap perusahaan bagi setiap pekerja tempatan yang bergaji RM4,000 dan ke bawah. Kedua, **Menaik Taraf Portal Perkhidmatan Pekerjaan Negara** bertujuan untuk memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja. Ketiga, **Program Insentif Pengambilan Pekerja dan Bantuan Latihan** bagi menggalakkan pengambilan pekerja dengan menyediakan insentif kewangan kepada majikan. Keempat, **Program Kemahiran dan Peningkatan Kemahiran** bagi meningkatkan kebolehpasaran golongan penganggur melalui program latihan untuk mendapat kemahiran dan meningkatkan kemahiran dan kelima, **Perlindungan Sosial dan Latihan bagi Pekerja Ekonomi Gig** bagi menjamin keselamatan sosial dan kebajikan golongan pekerja ekonomi gig.

4. Untuk memastikan peluang pekerjaan terus di cipta dalam bulan-bulan yang akan datang, dan bagi mewujudkan lebih banyak peluang pekerjaan kepada rakyat Malaysia yang kehilangan pekerjaan, beberapa inisiatif sedang dan akan dilaksanakan oleh Kerajaan. Antaranya adalah:

- (i) meningkatkan pelaburan nilai tinggi melalui *Foreign Direct Investment* (FDI) dan *Domestic Direct Investment* (DDI) bagi meningkatkan penghasilan pekerjaan yang bersifat *high value jobs* dan *knowledge worker* (k-worker) agar kadar upah yang tinggi dapat dinikmati oleh golongan ini;
- (ii) melaksanakan latihan-latihan kemahiran yang bersifat *internship* seperti Sistem Latihan Dual Nasional (SLDN) untuk meningkatkan kebolehpasaran pelajar;

SOALAN NO : 22

- (iii) menyediakan insentif-insentif untuk syarikat bagi memperbanyakkan elemen-elemen berteknologi tinggi yang dijangka akan meningkatkan jumlah peluang pekerjaan berkemahiran tinggi; dan
- (iv) mengadakan sesi libat urus bersama industri bagi membincangkan isu sekaligus mengambil langkah-langkah untuk mengurangkan kebergantungan terhadap pekerja asing.

5. Bagi menyokong usaha-usaha di atas, Kerajaan harus menyediakan pekerja-pekerja berkemahiran yang memenuhi keperluan industri. Sehubungan itu, beberapa langkah sedang diambil oleh Kementerian, antaranya:

- (i) program *upskilling* dan *reskilling* disediakan kepada golongan pekerja bagi mempertingkatkan kemahiran mereka bagi menyesuaikan diri dengan perubahan keperluan kerja masa hadapan serta persekitaran global yang semakin kompetitif dan dinamik. Program *upskilling* dan *reskilling* dilaksanakan secara berterusan supaya kemahiran yang diperolehi sentiasa bersesuaian dengan keperluan industri semasa;
- (ii) Kementerian Sumber Manusia (KSM) melalui Jabatan Pembangunan Kemahiran (JPK), telah membangunkan *National Occupational Skills Standard* (NOSS) bagi 21 sektor ekonomi. NOSS ini telah menjadi rujukan dalam pembangunan program latihan di institusi-institusi latihan awam dan swasta mengikut tahap kemahiran yang diperlukan. NOSS yang dibangunkan dan dipantau secara bersama dengan *Industry Lead Body* (ILB) adalah mengikut keperluan industri dan teknologi terkini;
- (iii) memperluaskan akses kepada warganegara untuk mendapat Latihan dan Pendidikan Teknikal dan Vokasional (TVET). Sehingga kini, terdapat lima ratus enam puluh dua (562) buah

SOALAN NO : 22

Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan

- (iv) KSM dan Kementerian Pengajian Tinggi (KPT) telah diberikan peranan sebagai Pengerusi bersama bagi menerajui Jawatankuasa Kerja Pembangunan Kemahiran dan Bakat (TWG-S) Industry4WRD. Jawatankuasa ini berperanan mengenal pasti keperluan pasaran buruh dan kemahiran yang diperlukan serta menyelaraskan dan melaksanakan usaha-usaha dalam memperkukuhkan kompetensi sumber manusia bagi menghadapi Industri 4.0. Usaha ini dapat dilakukan melalui program *upskilling* dan *reskilling* yang disediakan kepada golongan pelajar kemahiran dan pekerja bagi mempertingkatkan kemajuan sendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran global yang semakin kompetitif dan dinamik.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN ANYI NGAU [BARAM]

TARIKH : 30 NOVEMBER 2020 (ISNIN)

SOALAN

TUAN ANYI NGAU [BARAM] minta **MENTERI KESIHATAN** menyatakan status pelaksanaan pembaikan semula Klinik Kesihatan Long Lama akibat kejadian tanah runtuh baru-baru ini.

JAWAPAN

Tuan Yang di-Pertua,

1. Kementerian Kesihatan Malaysia mengambil berat tentang kejadian tanah runtuh yang berlaku di Klinik Kesihatan Long Lama yang telah dilaporkan pada 19 Jun 2020. Pemeriksaan yang telah dilakukan mendapati bahawa gangguan fizikal cerun telah menyebabkan kawasan jalan raya di bahagian hadapan klinik telah mendap dan merekah. Kegagalan cerun mengakibatkan kerosakan pada struktur pintu masuk utama dan sebahagian bangunan klinik kesihatan. Struktur *porch* di laluan pintu masuk utama telah mendap sehingga 1.20m dan berisiko untuk runtuh sekiranya mendapan susulan berlaku. Ini menyebabkan bahagian hadapan klinik (*car porch*) telah dirobohkan pada 28 Jun 2020 bagi mengelakkan kerosakan lanjut di Klinik berkenaan.

2. Oleh yang demikian, Kementerian telah melantik Cawangan Kejuruteraan Cerun, JKR Malaysia sebagai Agensi Pelaksana dan meluluskan peruntukan sebanyak RM450 ribu pada 3 Julai 2020 untuk

SOALAN NO : 23

menampung keperluan kerja-kerja pembaikan sementara di Klinik berkenaan. Selain itu, Kementerian juga telah meluluskan peruntukan tambahan sebanyak RM447 ribu pada 19 Ogos 2020 yang diperlukan oleh JKR Malaysia untuk melaksanakan kerja-kerja *soil investigation* (SI), *sheet-piling* dan kerja-kerja pembaikan sementara.

3. Selain itu, kerja-kerja pembaikan sementara juga sedang giat dilaksanakan bagi mewujudkan laluan akses sementara ke dalam kawasan klinik, pembinaan sistem perparitan dan mewujudkan tempat letak kereta sementara bagi kakitangan klinik di mana baki kerja tersebut, iaitu kerja-kerja menurap laluan akses sementara dengan tar akan dijalankan oleh kontraktor yang telah dilantik.

4. JKR Miri juga telah melantik kontraktor pada 5 Oktober 2020 untuk melaksanakan kerja-kerja *remedial work – sheet-piling* di bahagian hadapan klinik yang terjejas. Tempoh kontrak adalah selama 3 bulan di mana tarikh milik tapak adalah pada 5 Oktober 2020 dan tarikh siap semasa adalah pada 4 Januari 2021. JKR Miri telah memaklumkan bahawa kemajuan fizikal projek setakat 23 November 2020 adalah sebanyak 85%.

5. Operasi Klinik Kesihatan Long Lama telah dipindahkan buat sementara waktu ke Dewan Masyarakat Long Lama di mana Majlis Daerah Marudi telah memberikan kelulusan penggunaan Dewan Masyarakat tersebut dengan pengecualian sewa sehingga Jun 2021.

6. JKR Sarawak memaklumkan bahawa kerja-kerja *soil investigation* akan dapat dimulakan selepas kerja sheet piling selesai yang dijangka pada awal tahun 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN HASSAN BIN ABDUL KARIM
[PASIR GUDANG]**

TARIKH : 30 NOVEMBER 2020 (ISNIN)

SOALAN

TUAN HASSAN BIN ABDUL KARIM [PASIR GUDANG] minta **MENTERI SUMBER MANUSIA** menyatakan berapa banyak syarikat yang mendapat manfaat melalui Program Subsidi Upah dan sejauh mana kesannya dalam menghalang pekerja hilang pekerjaan dan syarikat tutup perniagaan.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, Kerajaan amat prihatin dengan nasib rakyat dan juga berusaha untuk memastikan keadaan ekonomi negara dapat dipulihkan.
2. Bagi tujuan menghalang pekerja hilang pekerjaan dan syarikat tutup perniagaan, Kerajaan telah memperkenalkan Program Subsidi Upah (PSU) yang mana objektif utama program ini adalah untuk mengekalkan pekerja serta mengekang pemberhentian secara besar-besaran.
3. Sehingga 6 November 2020, sebanyak **331,950** majikan telah menerima manfaat menerusi Program Subsidi Upah (PSU) yang melibatkan lebih **2.7 juta** pekerja. Bayaran keseluruhan sebanyak **RM12.21 bilion** telah dimanfaatkan oleh para majikan.
4. Manakala Program Subsidi Upah 2.0 (PSU 2.0), bermula 1 Oktober 2020 sehingga 6 November 2020, PERKESO telah menerima sebanyak **61,382** permohonan dari majikan melibatkan **611,276** pekerja. Bayaran sebanyak **RM122.19** juta telah dimanfaatkan oleh para majikan.
5. Kesan daripada pelaksanaan program ini telah berjaya mengekalkan lebih **3.3 juta** pekerja daripada kehilangan pekerjaan. Kerajaan yakin dengan lanjutan Program Subsidi Upah 2.0 sehingga akhir Disember 2020 akan dapat memberi manfaat kepada lebih ramai lagi majikan dan pekerja yang terjejas. Secara keseluruhannya, pelaksanaan program PSU telah memberi kesan signifikan dalam mengekang pekerja hilang pekerjaan dan syarikat daripada menutup perniagaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH : 30 NOVEMBER 2020 (ISNIN)

SOALAN

TENGKU ZULPURI BIN RAJA PUJI [RAUB] minta **MENTERI KESIHATAN** menyatakan seperti mana yang kita tahu, seorang ADUN di Melaka telah positif COVID-19, yang mana beliau telah mendakwa bahawa keputusannya negatif pada awalnya, namun setelah kembali ke pejabat dan berkhidmat, keputusan menunjukkan beliau positif COVID-19:

- a) apakah terdapat sebarang kesalahan teknikal di makmal Kementerian yang menyebabkan kecelaruan ini atau adakah ujian swab tersebut mempunyai kelemahan dalam mengesan COVID-19, jika ya, apakah tindakan Kementerian untuk menambah baik perkara tersebut; dan
- b) berapa peruntukan tambahan yang disalurkan oleh Kerajaan Pusat kepada hospital negeri, klinik, klinik desa dalam tahun ini 2020 utk menangani wabak COVID-19.

JAWAPAN

Tuan Yang di-Pertua,

1. Insiden melibatkan seorang ADUN di Melaka ini telah tular melalui media sosial dan kenyataan media mengenainya telah dikeluarkan oleh Pengarah Jabatan Kesihatan Negeri Melaka pada 1 Oktober 2020.

2. ADUN berkenaan telah pulang dari Sabah pada 27 September 2020 dan telah menjalani ujian saringan di Pintu Masuk Antarabangsa serta mematuhi arahan kuarantin sebagaimana yang ditetapkan. ADUN terlibat telah dimaklumkan mengenai keputusan positif beliau pada 30 September 2020. Tindakan kawalan dan pencegahan telah diambil dengan serta-merta sebaik beliau disahkan positif termasuk pengesanan kontak dan disinfeksi serta beliau segera dirujuk untuk menerima rawatan di Hospital Melaka. Selain itu, beberapa kelemahan yang dikesan dari kejadian ini telah ditambahbaik khususnya melibatkan proses kerja yang berkaitan dengan prosedur pelepasan arahan kuarantin.

Tuan Yang di-Pertua,

3. Kementerian Kesihatan Malaysia (KKM) telah diluluskan peruntukan sebanyak **RM1 bilion** oleh Kementerian Kewangan bagi menangani wabak COVID-19. Sehingga **31 Oktober 2020**, KKM telah membelanjakan sebanyak **RM1.17 bilion yang turut termasuk peruntukan sedia ada Kementerian** bagi pembelian peralatan, bekalan perubatan, barangan pakai habis (*consumables*), kelengkapan perlindungan diri (PPE), reagen dan *test kit* serta lain-lain perkhidmatan dalam usaha mengawal wabak COVID-19. Peruntukan tersebut digunakan untuk kesemua fasiliti KKM termasuk hospital, klinik kesihatan dan klinik pergigian.

4. Bagi menghargai jasa dan pengorbanan petugas barisan hadapan termasuk kakitangan perubatan yang terlibat secara langsung dalam pengurusan dan pembendungan wabak COVID-19, elaun khas yang diberikan sebanyak **RM400 sebulan** mulai Mac 2020 telah **ditingkatkan kepada RM600 sebulan** mulai April 2020 dan ia akan diteruskan

sehingga ancaman pandemik ini berjaya diatasi. Sehingga **31 Oktober 2020**, KKM telah membelanjakan sebanyak **RM275 juta bagi tujuan bayaran Elaun Khas COVID-19** ini.

5. Sebagai tambahan, dalam pengumuman Belanjawan 2021 Kerajaan bersetuju untuk melaksanakan **pemberian *one-off* sebanyak RM500** bagi menghargai jasa anggota barisan hadapan KKM yang dijangka memanfaatkan 100,000 petugas kesihatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN STEVEN CHOONG SHIAU YOON
(TEBRAU)**

TARIKH : 30 NOVEMBER 2020 (SELASA)

SOALAN

TUAN STEVEN CHOONG SHIAU YOON [TEBRAU] minta **MENTERI
DALAM NEGERI** menyatakan jumlah permohonan masuk dan keluar
Malaysia telah diterima dan berapa telah dilulus dan ditolak sejak
MyTravelPass diperkenalkan.

JAWAPAN

Tuan Yang Di Pertua,

Seperti mana Ahli Yang Berhormat sedia maklum, Perintah Kawalan Pergerakan (PKP) dikuat kuasa oleh Kerajaan bermula 18 Mac 2020 sehingga kini bagi membendung penularan pandemik COVID-19, dan ianya termasuklah pengukuhan kawalan pintu masuk dan sempadan negara. Bagi tujuan ini, Kerajaan memperkenalkan kawalan kemasukan warganegara asing ke Malaysia melalui penetapan syarat-syarat permohonan yang ketat bagi kategori warganegara asing yang dibenarkan serta pertimbangan kemasukan secara *case-to-case basis*.

Bermula 7 Oktober 2020, Jabatan Imigresen Malaysia (JIM) memperkenalkan MyTravelPass (MTP) iaitu suatu sistem permohonan kebenaran masuk dan ke luar negara untuk warganegara Malaysia dan warganegara asing sebagai salah satu inisiatif penambahbaikan proses permohonan tersebut. Sistem MTP berjaya memendekkan tempoh masa kelulusan permohonan kepada tiga hingga lima hari bekerja berbanding jangka masa antara tujuh hingga sepuluh hari melalui permohonan menggunakan e-mel.

Jumlah permohonan keseluruhan yang diterima oleh JIM melalui MTP bagi tempoh mulai 18 Mac 2020 hingga 19 November 2020 adalah sebanyak 30,061 permohonan. Daripada jumlah tersebut, sebanyak 15,787 permohonan telah diluluskan manakala 11,207 permohonan telah ditolak. Baki sebanyak 3,067 permohonan sedang dalam tindakan pemprosesan oleh JIM.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATO' SRI ABDUL AZEEZ BIN ABDUL RAHIM
(BALING)**

TARIKH : 30 NOVEMBER 2020 (SELASA)

SOALAN

DATO' SRI ABDUL AZEEZ BIN ABDUL RAHIM [BALING] minta **MENTERI DALAM NEGERI** menyatakan apakah punca peningkatan mendadak kes positif COVID-19 di beberapa buah penjara di Sabah, Kedah dan Pulau Pinang serta apakah langkah terperinci yang telah diambil oleh Kerajaan bagi menjaga kebajikan warga penjara dan banduan yang terlibat dalam kuarantin wajib di premis penjara terlibat.

JAWAPAN

Tuan Yang Di Pertua,

Untuk makluman Ahli Yang Berhormat, beberapa institusi penjara terjejas akibat penularan wabak COVID-19. Statistik Jabatan Penjara Malaysia sehingga 03 November 2020 menunjukkan seramai 1,160 banduan telah disahkan positif COVID-19. Manakala bagi kes anggota dan keluarga anggota pula, pada tarikh tersebut seramai 125 orang disahkan positif.

Pelbagai usaha telah dilaksanakan oleh Jabatan Penjara Malaysia melalui Kementerian Dalam Negeri (KDN) dengan kerjasama Kementerian Kesihatan Malaysia (KKM) dalam memastikan penularan wabak ini adalah terkawal dalam komuniti penjara. Walaupun tindakan pencegahan dan kawalan penyakit telah diambil, namun penularan wabak ini masih berlaku. Antara faktor penyumbang kepada berlakunya jangkitan COVID-19 di penjara adalah kekangan pengurusan penjara untuk melaksanakan pengasingan banduan baharu disebabkan kesesakan penjara dan kesukaran untuk mengenalpasti banduan yang dijangkiti COVID-19 kerana kebanyakan banduan tidak menunjukkan simptom COVID-19.

Kementerian Kesihatan Malaysia telah mula melakukan ujian pengesanan COVID-19 kepada semua banduan baharu sebelum ditempatkan di blok kuarantin penjara atau di hospital atau di pusat-pusat kurantin di luar penjara.

Selain itu, Jabatan Penjara Malaysia juga telah mengarahkan agar semua institusi penjara mematuhi prosedur operasi standard (SOP) yang telah dikeluarkan oleh KKM berhubung keperluan pelaksanaan ujian *swab* kepada banduan dan anggota yang mempunyai kontak rapat dengan individu yang positif COVID-19.

SOALAN NO : 27

Dalam menghadapi penularan wabak COVID-19, KDN dan Jabatan Penjara Malaysia sentiasa mengambil berat tentang kebajikan anggota penjara termasuk banduan yang terlibat semasa mereka menjalani kuarantin wajib di beberapa institusi penjara yang terkesan dengan wabak ini. Antara inisiatif-inisiatif yang telah diambil bagi maksud pengurusan kebajikan dan kesihatan mereka yang terlibat adalah seperti berikut:

a. Pentadbiran Penjara

- i. Jawatankuasa Urusetia Pengurusan Krisis COVID-19 diwujudkan dan diaktifkan;
- ii. Blok-blok yang melibatkan banduan positif dijadikan kawasan *lockdown*;
- iii. Pengoperasian Penjara Sementara diwujudkan bagi mengelakkan kesesakan;
- iv. Mewujudkan pangkalan (*base*) untuk anggota KKM di kawasan berhampiran untuk merawat banduan yang tidak kritikal di blok penempatan;
- v. Membuat sanitasi dalam dan luar penjara sebanyak 2 (dua) kali sehari; dan
- vi. Mewujudkan Tabung COVID-19 Jabatan Penjara Malaysia bagi tujuan membantu anggota dan juga ahli keluarga anggota yang dijangkiti dan yang terkesan akibat wabak COVID-19.

b. Pengurusan logistik

- i. Penyediaan kelengkapan *Personal Protective Equipment* (PPE) yang mencukupi untuk kegunaan kakitangan dan banduan;
- ii. Penyediaan makanan banduan menggunakan bekas pakai buang;
- iii. Membuat sewaan kenderaan yang diperlukan bagi tujuan pergerakan tambahan semasa krisis;

- iv. Menyediakan tempat rehat pegawai yang dilengkapi dengan kemudahan asas; dan
- v. Kemudahan mesin basuh dan mesin pengering diwujudkan di dalam penjara.

c. Pengurusan anggota

- i. Membuat atur tugas secara bergilir mengikut divisyen;
- ii. Menyediakan makan minum kepada pegawai bertugas dengan menggunakan pembekal luar;
- iii. Pembekuan cuti anggota;
- iv. Anggota KKM, Pegawai Psikologi dan Kaunseling Penjara menjalankan pengurusan *stress* dan pengurusan emosi terhadap anggota; dan
- v. Mendapatkan anggota bantuan daripada penjara berhampiran sekiranya anggota sedia ada di penjara terlibat, tidak mencukupi.

d. Pengurusan banduan

- i. Banduan sedia ada dalam penjara tidak dibenarkan keluar penjara kecuali bagi tujuan rawatan;
- ii. Pergerakan dalam penjara dihadkan kecuali banduan kerja dapur dan banduan kebersihan;
- iii. Lawatan / perjumpaan keluarga secara bersemuka banduan dibatalkan dan digantikan dengan panggilan melalui *Wartel / MyFon* serta aplikasi *Zoom* bagi banduan yang tidak dikuarantin; dan
- iv. Perjumpaan peguam ditangguhkan sementara.

SOALAN NO : 27

Selain itu, Jabatan Penjara Malaysia juga telah melaksanakan langkah-langkah bagi perkara seperti berikut:

a. Perkara dibenarkan

- i. Kemasukan Pegawai Perubatan di penjara;
- ii. Kemasukan pegawai penjara yang tinggal di luar kuarters untuk bertugas;
- iii. Kemasukan kenderaan barangan makanan dan keperluan asas;
- iv. Kemasukan pegawai yang mengurus proses nyahkuman;
- v. Kemasukan kakitangan bantuan dari lain-lain penjara; dan
- vi. Pembelian barangan secara atas talian (*on-line*).

b. Perkara tidak dibenarkan

- i. Kemasukan banduan baru;
- ii. Sebarang perjumpaan dengan banduan; dan
- iii. Semua aktiviti luar melibatkan banduan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN XAVIER JAYAKUMAR A/L
ARULANANDRAM (KUALA LANGAT)**

TARIKH : 30 NOVEMBER 2020 (SELASA)

SOALAN

DATO' DR. XAVIER JAYAKUMAR A/L ARULANANDRAM [KUALA LANGAT] minta **MENTERI DALAM NEGERI** menyatakan Bandar Saujana Putra (BSP) memerlukan balai polis memandangkan jumlah penduduk di kawasan itu sudah meningkat. Adakah balai polis akan dibina di BSP dalam masa terdekat demi keselamatan dan kesejahteraan hidup masyarakat BSP.

JAWAPAN

Tuan Yang Di Pertua,

Pada masa ini, terdapat balai polis di Bandar Saujana Putra yang merupakan balai polis komuniti dan menggunakan perjawatan secara sandaran dari Balai Polis Sg. Jarum. Balai polis komuniti ini beroperasi di bangunan kedai milik Syarikat LBS Bina Group Berhad yang digunakan tanpa sebarang kos sewaan dikenakan kepada Polis Diraja Malaysia (PDRM). Kekuatan anggota di balai polis komuniti ini adalah seramai lapan (8) orang dengan kawasan operasi seluas 3.987 km² dan jumlah penduduk seramai 27,450 orang. Berdasarkan rekod, indeks jenayah bagi sepanjang tahun 2019 di kawasan ini adalah sebanyak 22 kes manakala dari 1 Januari 2020 sehingga 30 September 2020, sebanyak 36 kes telah direkodkan.

Kementerian Dalam Negeri (KDN) mengakui bahawa terdapat keperluan bagi mewujudkan balai polis di kawasan ini dan tindakan susulan sedang diambil serta dijangkakan perancangan projek ini akan disenaraikan dalam program pembangunan fizikal Rancangan Malaysia. Dalam masa yang sama juga, KDN perlu mematuhi penetapan dasar Kerajaan yang menggariskan perancangan sesuatu projek Balai Polis baharu perlu mempunyai perjawatan sekurang-kurangnya 20 orang sebagai asas untuk pertimbangan serta perlu mempunyai tapak tanah yang berkeluasan 5 hingga 10 ekar yang disediakan oleh pihak Kerajaan Negeri.

Ketetapan ini adalah berdasarkan Garis Panduan dan Peraturan bagi Perancangan Bangunan Edisi Tahun 2015, Jawatankuasa Standard dan Kos, Unit Perancang Ekonomi. Sehubungan itu, penyelarasan dalam perancangan projek Rancangan Malaysia Ke-12 akan dibuat setelah isu perjawatan dan tapak tanah diselesaikan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN**
menyatakan rancangan Kementerian untuk mengadakan :-

- (a) skim padi di Nanga Merit dan di Sungai Tunoh, Daerah Bukit Mabong, Bahagian Kapit; dan
- (b) di Tubau, Bahagian Bintulu.

JAWAPAN

Tuan Yang Dipertua,

1. Untuk makluman Ahli Yang Berhormat, sebarang perancangan pembangunan kawasan penanaman padi di Negeri Sarawak terletak di bawah autoriti Kerajaan Negeri. Walau bagaimanapun, Kementerian sentiasa komited membantu Kerajaan Negeri untuk meningkatkan pengeluaran beras negara sehingga mencapai tahap sara diri sebanyak 75% seperti yang digariskan dalam cadangan Kertas Strategi RMKe-12 bagi industri padi.

2. Antara perancangan pembangunan kawasan penanaman padi oleh Kerajaan Negeri sama ada telah atau sedang dilaksanakan adalah seperti berikut:

- i) Nanga Merit, Kapit – kawasan skim padi di Nanga Merit seluas 159 hektar merupakan skim sedia ada yang telah dibangunkan dengan infrastruktur pengairan dan saliran peringkat primer serta sekunder oleh Jabatan Pengairan dan Saliran (DID) Sarawak. Sehingga kini, penanaman padi dilakukan semusim setahun dan melibatkan kawasan seluas 112.5 hektar. Infrastruktur tersier juga akan dibangunkan untuk menggalakkan penanaman padi dua musim setahun;
- ii) Sungai Tunoh, Kapit – kawasan ini berkeluasan 215 hektar telah dicadangkan dengan pembangunan kemudahan ladang, infrastruktur pengairan dan saliran bagi peringkat primer, sekunder serta tersier untuk tujuan penanaman padi dua musim setahun; dan
- iii) Tubau, Bintulu – Kerajaan Negeri akan mengenalpasti beberapa kawasan yang berpotensi untuk dibangunkan dengan skim padi di kawasan tersebut jika sesuai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHAMADDIN BIN KETAPI
[LAHAD DATU]**

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan perancangan Kementerian untuk memperhebatkan lagi sektor agro-pelancongan khususnya dalam menarik minat pelancong domestik.

JAWAPAN

Tuan Yang Di-Pertua,

Untuk makluman, Kementerian Pertanian dan Industri Makanan (MAFI) sememangnya memberi perhatian kepada sektor agropelancongan. Di antara inisiatif Kementerian untuk memperhebatkan lagi sektor agro-pelancongan khususnya dalam menarik minat pelancong domestik adalah seperti berikut:

1. Geran membina dan menaiktaraf infrastruktur pusat agropelancongan.

Setiap tahun, Kerajaan menyediakan program agropelancongan dengan memberi bantuan geran membina dan menaiktaraf infrastruktur kepada pusat-pusat agropelancongan yang diusahakan oleh golongan sasaran. Objektif program ini adalah untuk memperkasakan aktiviti ekonomi dan keusahawanan masyarakat tani dengan mempelbagaikan sumber pendapatan mereka serta membuka peluang pekerjaan baru kepada

penduduk setempat. Bagi tahun 2020 sejumlah geran bernilai RM3,366,090.00 telah diberikan kepada 35 pusat agropelancongan. Manakala pada tahun 2019, sejumlah geran bernilai RM3,396,200.00 telah diberikan kepada 56 pusat agropelancongan;

2. Mempertingkatkan aktiviti promosi dengan kerjasama pihak berkepentingan dalam industri pelancongan

Keadaan pandemik Covid-19 semasa dalam negara telah memberi impak yang besar kepada pengusaha-pengusaha pusat agropelancongan. Oleh yang demikian, aktiviti promosi berskala besar secara fizikal tidak dapat dilaksanakan sepenuhnya pada tahun ini.

Sehubungan itu, Kementerian telah menjalinkan kerjasama bersama pihak-pihak berkepentingan dalam mempromosikan pusat-pusat agropelancongan di peringkat domestik serta antarabangsa seperti Kementerian Pelancongan, Seni dan Budaya Malaysia (MOTAC), Tourism Malaysia dan *Malaysia Inbound Tourism Association* (MITA); dan

3. Khidmat nasihat dan bimbingan jabatan dan agensi di bawah MAFI

Kementerian dengan jabatan dan agensi di bawahnya turut memberikan khidmat nasihat kepada pengusaha pusat agropelancongan yang berminat untuk memantapkan lagi industri agropelancongan melalui pelaksanaan program latihan yang lebih komprehensif kepada pengusaha pusat agropelancongan termasuk memperkasakan elemen pemasaran produk dan perkhidmatan mereka melalui platform digital.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 30 NOVEMBER 2020 (ISNIN)

SOALAN

TUAN WONG LING BIU [SARIKEI] minta **MENTERI SUMBER MANUSIA** menyatakan sektor perladangan dan pembinaan telah menghadapi kekurangan tenaga kerja secara drastik setelah pandemik wabak COVID-19. Apakah langkah-langkah yang telah diambil oleh pihak Kementerian untuk mengatasi masalah ini.

JAWAPAN

Tuan Yang Dipertua,

1. Kerajaan telah membekukan pengambilan pekerja asing baharu mengambil kira penularan wabak pandemik COVID-19. Kerajaan juga sedang mengambil pendekatan “*all out*” bagi memastikan pencari kerja warganegara diutamakan dalam pasaran pekerjaan sekaligus mengurangkan kadar pengangguran.

2. Bagi membantu industri khususnya sektor perladangan dan pembinaan yang memerlukan tenaga kerja, Kerajaan bermula 10 Jun 2020 telah melaksanakan program pertukaran majikan bagi membolehkan majikan yang tidak dapat meneruskan penggajian pekerja asing mereka supaya menyerahkan pekerja-pekerja tersebut kepada majikan baharu sama ada dalam sektor yang sama atau sektor yang berlainan. Proses ini dikendalikan sepenuhnya oleh Jabatan Tenaga Kerja Semenanjung Malaysia dan Kementerian Dalam Negeri. Selain itu, semua Agensi Kawal Selia turut diwajibkan merancang dan melaksanakan pelan penggantian (*exit strategy*) bagi memastikan sektor-sektor berintensifkan buruh beralih kepada penggunaan mekanisasi dan automasi sekaligus mengurangkan kebergantungan kepada pekerja asing dan mewujudkan pekerjaan yang memerlukan kemahiran. Antaranya seperti menekankan penggunaan kaedah pembinaan *Industrialised Building System* (IBS).

3. Pada masa yang sama, Kerajaan juga sedang meneliti pelbagai aspek dalam menambah baik pengurusan pengambilan pekerja asing secara holistik dan akan memaklumkan dasar untuk mengoptimumkan penglibatan pekerja warga asing dalam negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 30 NOVEMBER 2020 (ISNIN)

SOALAN

DATO' SRI RICHARD RIOT ANAK JAEM [SERIAN] minta **MENTERI KESIHATAN** menyatakan bilangan Pegawai Perubatan Kontrak yang sudah diserapkan ke dalam perkhidmatan tetap dan bilangan yang masih menunggu dan apakah langkah diambil oleh Kementerian untuk pegawai-pegawai kontrak yang masih menunggu.

JAWAPAN

Tuan Yang di-Pertua,

1. Sehingga 31 Oktober 2020, bilangan Pegawai Perubatan UD41 kontrak yang **layak dipertimbangkan** untuk pelantikan tetap adalah seramai **2,544 pegawai** yang terdiri daripada kohort Disember 2016 sehingga Mei 2017 yang telah menamatkan latihan siswazah.
2. Daripada jumlah tersebut, seramai **789 pegawai telah diberikan pelantikan tetap**, manakala **selebihnya masih dilantik secara kontrak** dan boleh dipertimbang pelantikan tetap tertakluk kepada kekosongan jawatan tetap serta memenuhi syarat dan kriteria yang ditetapkan.
3. Untuk makluman Ahli Yang Berhormat, kekosongan jawatan tetap bergantung kepada pertambahan jawatan baharu yang diwujudkan secara tukar ganti (*trade off*) dengan jawatan lain sedia ada, serta faktor atrisi seperti persaraan dan peletakan jawatan.

4. Kerajaan sedia ada mengambil **pendekatan rightsizing** dalam menimbang pewujudan jawatan baharu. Langkah ini dapat dilihat menerusi kelulusan Jabatan Perkhidmatan Awam (JPA) yang telah meluluskan sejumlah 997 jawatan Pegawai Perubatan bagi menampung keperluan di fasiliti baharu dan yang dinaiktaraf. Walau bagaimanapun, perlu difahami bahawa pertambahan jawatan ini bukannya bergantung kepada faktor keluaran graduan, sebaliknya tertakluk kepada keperluan sebenar pewujudan jawatan di fasiliti kesihatan untuk menyampaikan perkhidmatan kesihatan.

Tuan Yang di-Pertua,

5. Selain peluang pelantikan secara tetap yang diberikan di KKM, pegawai juga berpeluang untuk memohon pekerjaan di agensi awam yang lain seperti hospital-hospital universiti awam dan juga di sektor swasta dan syarikat yang memerlukan pekerja yang mempunyai pengetahuan serta kemahiran dalam bidang kesihatan seperti makmal perubatan swasta, syarikat farmaseutikal dan lain-lain.

6. Dalam masa yang sama, KKM kini sedang meneliti beberapa opsyen penambahbaikan bagi laluan kerjaya Pegawai Perubatan seperti mencadangkan pemberian kontrak yang lebih panjang. Walau bagaimanapun, perkara ini masih di peringkat awal dan perlu diangkat untuk kelulusan Kerajaan terlebih dahulu.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB MAHFUZ B. OMAR (POKOK SENA)

TARIKH : 30 NOVEMBER 2020

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI DALAM NEGERI** menyatakan berapa jumlah pekerja asing dihantar pulang ke negara asal dan berapa yang telah menjadi pendatang tanpa izin selepas Kerajaan membatalkan lesen outsourcing pada tahun 2018.

JAWAPAN

Tuan Yang Di Pertua,

Mesyuarat Jawatankuasa Bersama Antara Menteri Dalam Negeri dan Menteri Sumber Manusia Mengenai Pengurusan Pekerja Asing, Kali Pertama, Bil. 1/2018 bertarikh 24 Oktober 2018 telah menetapkan secara dasarnya supaya perkhidmatan *outsourcing* ditamatkan dan diadakan sesi libat urus bersama syarikat *outsourcing* sebelum satu tempoh masa penamatan lesen syarikat *outsourcing* ditetapkan.

Susulan itu, sebanyak **66 syarikat *outsourcing* (23.7%)** daripada keseluruhan 279 syarikat *outsourcing* telah mengemukakan permohonan **tukar majikan kepada majikan prinsipal** kepada pihak Kementerian. Jumlah ini melibatkan seramai **3,363 pekerja asing (23%)** dari 14,610 jumlah keseluruhan pekerja asing yang dimiliki 279 syarikat *outsourcing* (data MyIMMs sehingga 4 Januari 2019). Pekerja asing ini telah berada lama di negara ini dan kebanyakannya telah memasuki tempoh pengajian tahun ke 8, 9 dan 10 di bawah syarikat *outsourcing*.

Manakala seramai **8,885** pekerja asing di bawah syarikat *outsourcing* **telah dihantar pulang** (61%).

Sehubungan itu, lesen kesemua 279 pemegang lesen syarikat *outsourcing* telah ditamatkan pada 31 Mac 2019 dan mana-mana pekerja asing yang tidak terlibat dalam proses pertukaran majikan atau penghantaran pulang dikategorikan sebagai PATI.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN HAJAH NATRAH BINTI ISMAIL
(SEKIJANG)**

TARIKH : 30 NOVEMBER 2020 (SELASA)

SOALAN

PUAN HAJAH NATRAH BINTI ISMAIL [SEKIJANG] minta **MENTERI DALAM NEGERI** menyatakan jumlah kelulusan yang diberikan kepada pemohon Pemastautin Tetap di bawah kategori isteri, suami dan anak-anak warganegara asing dari 2016 hingga 2020.

JAWAPAN

Tuan Yang Di-Pertua,

Pengeluaran Kad Pengenalan Pemastautin Tetap (MyPR) oleh Jabatan Pendaftaran Negara (JPN) adalah berdasarkan Subperaturan 5(3)(b), Peraturan-Peraturan Pendaftaran Negara 1990. Untuk makluman Ahli Yang Berhormat, JPN tidak mengeluarkan MyPR berdasarkan kategori isteri, suami atau anak kepada warganegara asing. Permohonan MyPR boleh dipertimbangkan bagi mana-mana individu mempunyai passport yang sah dan Permit Masuk yang dikeluarkan oleh Jabatan Imigresen Malaysia (JIM).

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 30 NOVEMBER 2020 (ISNIN)

SOALAN

PUAN NOORITA BINTI SUAL [TENOM] minta **MENTERI KESIHATAN** menyatakan adakah Kementerian merancang untuk menaik taraf Hospital Tenom dalam masa terdekat ini

JAWAPAN

Tuan Yang di-Pertua,

1. Buat masa ini, Kementerian Kesihatan Malaysia **tidak mempunyai perancangan** untuk menaik taraf Hospital Tenom. Di bawah Rancangan Malaysia Kesebelas, *Rolling Plan 4* (RMKe-11,RP4), Kementerian Kesihatan Malaysia (KKM) **telah melaksanakan projek Membina Bangunan Jabatan Kecemasan Dan Dewan Bedah Hospital Tenom dengan kos berjumlah RM16 juta**. Projek ini telah bermula pada 18 November 2013 dan telah siap pada 5 Julai 2016. Skop bagi projek ini melibatkan kerja-kerja:

- i. Membina Bangunan Satu (1) Tingkat Untuk Jabatan Kecemasan Berkeluasan 998 meter persegi, 11 Katil, Bilik Pemeriksaan, Bilik Rawatan, Bilik Prosedur, Stor Peralatan;
- ii. Membina Bangunan Satu (1) Tingkat Untuk Jabatan Pesakit Luar Berkeluasan 515 meter persegi, Mengandungi Bilik Prosedur, Bilik Rawatan, Bilik Diabetes, Dan Ruang Menunggu (150 Orang); dan
- iii. Membina Bangunan Satu (1) Tingkat Untuk Bilik Bedah Berkeluasan 585 meter persegi yang mengandungi satu *Operation Room (Fully Equip), Scrub Room, Induction Room Dan Anaesthesia Store*.

2. KKM juga merancang untuk memperkukuhkan lagi Kluster Keningau di mana Hospital Keningau adalah pusat rujukan utama (*Lead Hospital*) yang terletak lebih kurang 47km dan mengambil masa 48 minit perjalanan daripada Hospital Tenom bagi menambahbaik capaian sistem perkhidmatan kesihatan terutamanya penduduk di sekitar Daerah Tenom, Keningau dan Tambunan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI TAJUDDIN BIN ABDUL
RAHMAN [PASIR SALAK]**

TARIKH : 30 NOVEMBER 2020 (ISNIN)

SOALAN

Minta **MENTERI PERTANIAN DAN INDUSTRI MAKANAN** menyatakan status pembinaan Pasar Tani Kekal Pekan Kampung Gajah.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Pertanian dan Industri Makanan (MAFI) melalui FAMA telah membangunkan Pasar Tani Kekal (PTK) yang merupakan premis untuk menempatkan peserta-peserta pasar tani bagi membolehkan mereka memasarkan produk secara harian terus kepada pengguna. Sehingga kini terdapat 31 buah PTK telah dibangunkan oleh FAMA.
2. Pada tahun 2017, projek Pasar Tani Kekal Kg. Gajah telah diluluskan dan pembinaannya dirancang untuk dilaksana pada tahun 2018. Walaubagaimanapun, pelaksanaan projek ini telah ditangguhkan selaras dengan arahan Kementerian Kewangan pada tahun 2018 supaya perolehan bekalan, perkhidmatan dan kerja sama ada tender terbuka, tender terhad dan rundingan terus dibatalkan dan ditender semula selepas ditentukan keutamaan dengan merujuk kepada Kementerian Hal Ehwal Ekonomi (MEA) dan Pejabat Belanjawan Negara (NBO).
3. Pada tahun 2019, projek ini telah mendapat kelulusan dan pembinaannya telah mula dilaksanakan pada 14 Oktober 2019 dengan kos projek sebanyak RM2.99 juta. Sehingga 22 Oktober 2020, pelaksanaan projek ini adalah mengikut jadual dengan kemajuan kerja sebanyak 42%. Projek ini dijangka dapat disiapkan pada 14 Februari 2021.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DORELL LEIKING
[PENAMPANG]**

TARIKH : 30 NOVEMBER 2020 (ISNIN)

SOALAN

DATUK IGNATIUS DORELL LEIKING [PENAMPANG] minta **MENTERI ALAM SEKITAR DAN AIR** menyatakan status rancangan tebatan banjir persekitaran kawasan LIDO Bandaraya Kota Kinabalu yang berjumlah RM76 juta seperti dalam senarai projek RP4 RMK-11 P.174 Penampang yang diumumkan oleh Jabatan Perdana Menteri pada 18 Februari 2019.

JAWAPAN

Tuan Yang Di-Pertua,

1. Kerajaan telah meluluskan peruntukan sebanyak RM76 Juta bagi melaksanakan Projek Rancangan Tebatan Banjir (RTB) Persekitaran Kawasan Lido Bandaraya Kota Kinabalu, Sabah untuk dilaksanakan oleh Kementerian Alam Sekitar dan Air (KASA) melalui Jabatan Pengairan dan Saliran (JPS).
2. Projek Rancangan Tebatan Banjir (RTB) Persekitaran Kawasan Lido Bandaraya Kota Kinabalu, Sabah ini dalam peringkat memuktamadkan dokumen tender dan dijangka tender kerja fizikal pada awal tahun 2021.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

DARIPADA : YB TUAN SALAHUDDIN BIN AYUB (PULAI)

TARIKH : 30 NOVEMBER 2020 (SELASA)

SOALAN

DATUK SERI HAJI SALAHUDDIN BIN AYUB (PULAI) minta **MENTERI DALAM NEGERI** menyatakan apakah Ops NAGA masih diteruskan bagi menyelamatkan hasil negara dan membela nasib nelayan terutama dalam mendepani krisis Covid-19.

JAWAPAN

Tuan Yang Di Pertua,

Sehingga kini, Ops NAGA masih diteruskan walaupun ketika pandemik COVID-19 melanda, di mana sebahagian kekuatan aset dan anggota turut difokuskan kepada Op Benteng. Sungguhpun demikian, Op NAGA tetap berjalan dengan optimum bagi mengekang pencerobohan Bot Nelayan Asing (BNA) dan menyelamatkan hasil negara serta membela nasib nelayan tempatan.

Sepanjang tempoh operasi ini dilaksanakan sehingga 30 September 2020, sebanyak 12,582 pemeriksaan dibuat dan 338 tangkapan berjaya dilakukan. Daripada jumlah tersebut sebanyak 164 kes melibatkan Bot Nelayan Asing (BNA) dari Vietnam. Melalui operasi ini kerajaan berjaya memperoleh sebanyak RM364,993,800.00 hasil daripada nilai rampasan bot dan denda yang dikenakan kepada pemilik BNA yang melakukan kesalahan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN LIM GUAN ENG (BAGAN)

TARIKH : 30 NOVEMBER 2020 (SELASA)

SOALAN

TUAN LIM GUAN ENG [BAGAN] minta **MENTERI DALAM NEGERI** menyatakan tindakan yang diambil ke atas ahli pentadbiran yang kembali dari Sabah dan tidak mematuhi SOP pengawasan COVID-19 seperti memakai gelang putih dan kuarantin sendiri di rumah selama 14 hari dan apakah status tindakan ke atas YB Menteri Perusahaan Perladangan dan Komoditi.

JAWAPAN

Tuan Yang Di Pertua,

Seperti yang diumumkan Menteri Kanan (Keselamatan), bermula 27 September 2020, setiap individu yang tiba dari Sabah diwajibkan menjalani ujian saringan COVID-19, memuat turun dan mendaftar aplikasi MySejahtera dan daftar masuk menggunakan aplikasi ini setibanya di pintu masuk dan seterusnya menjalani ujian saringan COVID-19 dan perlu menjalani kuarantin sehingga keputusan diperoleh. Kesemua individu ini kemudiannya akan diberi surat perintah pengawasan dan pemerhatian di rumah (HSO) dan dipakaikan gelang tangan. Tempoh HSO adalah dari tarikh ketibaan di pintu masuk sehingga keputusan makmal diperolehi. Sekiranya keputusan ujian saringan negatif, pelepasan daripada HSO akan diberikan serta perlu ke klinik kesihatan untuk memotong gelang kuarantin tanpa perlu menunggu tempoh 14 hari.

Ketika ini, semua anggota pentadbiran yang kembali dari Sabah telah dikenakan peraturan ini dan kesemuanya mematuhi peraturan ini.

Berhubung dakwaan pelanggaran perintah kuarantin oleh YB Menteri Perusahaan Perladangan dan Komoditi, pihak polis telah mengemukakan kertas siasatan kepada pihak Jabatan Peguam Negara. Jabatan Peguam Negara memutuskan untuk tidak mengemukakan sebarang pertuduhan terhadap YB Menteri Perusahaan Perladangan dan Komoditi setelah didapati tiada keterangan yang kukuh bagi memenuhi beban bukti untuk memulakan pendakwaan di mahkamah.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 30 NOVEMBER 2020 (SELASA)

SOALAN

TUAN SANISVARA NETHAJI RAYER A/L RAJAJI [JELUTONG] minta **MENTERI DALAM NEGERI** menyatakan apakah perkembangan penyiasatan kes-kes kematian anggota bomba arwah Muhammad Adib dan anggota Jabatan Kastam Diraja Malaysia cawangan Rantau Panjang, arwah Anisah Ali dan bilakah suspek-suspek yang terlibat akan diheret ke mahkamah dan dituduh

JAWAPAN

Tuan Yang Di Pertua,

Sebagaimana Ahli Yang Berhormat semua sedia maklum, bagi kes kematian Allahyarham Muhammad Adib bin Mohd Kassim, Mahkamah Koroner Shah Alam yang bersidang pada 27 September 2019, telah memutuskan punca kematian anggota bomba berkenaan bukanlah disebabkan kemalangan tetapi disebabkan perbuatan jenayah oleh dua (2) orang atau lebih suspek. Berdasarkan keputusan tersebut, PDRM telah menjalankan siasatan berdasarkan arahan Pejabat Peguam Negara dan mengumpul bukti-bukti yang ada untuk dikemukakan semula kepada pihak pendakwa.

Kertas siasatan juga telah dirujuk semula ke Jabatan Peguam Negara

pada 23 Julai 2020 dengan cadangan-cadangan seperti berikut:

- i. Menuduh 12 orang suspek di bawah Seksyen 143 Kanun Keseksaan yang merusuh dan menyerang jentera bomba; dan
- ii. Mengadakan inkues semula untuk siasatan lanjut jika dipersetujui oleh Peguam Negara di bawah peruntukan Seksyen 339(2) Kanun Prosedur Jenayah.

Memandangkan sehingga kini Kertas Siasatan dan cadangan inkues semula berkenaan masih berada di Jabatan Peguam Negara (AGC), saya tidak berhasrat untuk mengulas lebih lanjut isu inkues semula ini agar tidak mengganggu siasatan ataupun mendahului keputusan AGC

Tuan Yang Di Pertua,

Bagi kes kematian Allahyarhamah Anisah binti Ali, anggota Jabatan Kastam Diraja Malaysia (JKDM) cawangan Rantau Panjang pula, kenderaan dinaiki pegawai berkenaan telah terbabas semasa mengejar kenderaan disyaki tonto ketika menjalankan tugas operasi Cegah Penyeludupan. Kejadian berkenaan berlaku pada 7 Oktober 2016 di Kampung Banggol Kong Pasir Mas Kelantan. Kes telah disiasat dibawah Sek.304(A) Kanun Keseksaan dan pihak polis telah membuat tangkapan terhadap enam (6) suspek yang mana salah seorang suspek telah dituduh di bawah seksyen 201 Kanun Keseksaan.

Walau bagaimanapun, suspek telah dilepaskan dan dibebaskan oleh mahkamah tanpa dipanggil membela diri pada 11/02/2019 manakala suspek-suspek lain telah dibebaskan dengan jamin atas arahan AGC kerana tiada bukti kukuh untuk mengaitkan penglibatan mereka dalam kes ini. Pihak polis masih menjalankan siasatan lanjut berkenaan dalam kes ini.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 30 NOVEMBER 2020 (ISNIN)

SOALAN

PUAN VIVIAN WONG SHIR YEE [SANDAKAN] minta **MENTERI KESIHATAN** menyatakan:

- (a) apakah tindakan Kementerian untuk mengendalikan pesakit dibawah jagaan Klinik Pakar semasa penutupan operasi Klinik Pakar akibat penularan wabak COVID -19 di Sabah khususnya Sandakan; dan
- (b) adakah Kementerian bercadang untuk menghantar pesakit mendapatkan rawatan di hospital swasta bagi kes kritikal.

JAWAPAN

Tuan Yang di-Pertua,

1. Walaupun negeri Sabah mencatatkan bilangan kes positif COVID-19 yang agak tinggi, Kementerian Kesihatan Malaysia akan terus komited memberikan rawatan kepada pesakit-pesakit di semua fasiliti perkhidmatan kesihatan termasuklah Klinik Pakar dan di Hospital Duchess of Kent, Sandakan.
2. Klinik Pakar di hospital KKM **tetap beroperasi** dalam keadaan norma baharu dengan pematuhan SOP yang ditetapkan seperti mengikut kapasiti yang dibenarkan sewaktu pandemik ini. Antara langkah yang diambil untuk mengendalikan klinik ini adalah seperti:

- a) Perkhidmatan secara maya, termasuk '*virtual clinic*' telah dimulakan dan akan diperluaskan di beberapa hospital serta klinik kesihatan;
- b) Menghubungi pesakit melalui telefon atau khidmat pesanan ringkas untuk memberikan tarikh temujanji baru kepada pesakit;
- c) Perkhidmatan Ubat Melalui Pos (UMP) bagi membekalkan ubat susulan terus ke lokasi pilihan pesakit melalui pos;
- d) Pengoperasian Jabatan Farmasi seperti biasa di mana pesakit atau waris masih boleh mengambil ubat seperti biasa;
- e) Pengambilan darah masih diteruskan untuk pesakit yang memerlukan perkhidmatan *Medication Therapy Adherence Clinic* (MTAC) *Warfarin*; dan
- f) Pesakit yang memerlukan rawatan susulan segera akan dihubungi untuk hadir ke Jabatan Kecemasan dan Trauma dan akan dilihat oleh Pegawai Perubatan atas panggilan dari disiplin masing-masing untuk memastikan pesakit mendapat rawatan secara berterusan.

3. Di samping itu, melalui Hospital Kluster juga, perkhidmatan kesihatan di Sabah sewaktu pandemik telah dipertingkatkan dengan koordinasi dan mengoptimumkan semua sumber yang ada. Semua tindakan ini dilaksanakan bertujuan memastikan pesakit di Sabah diberikan perkhidmatan kesihatan yang baik.

Tuan Yang di-Pertua,

4. Bagi memastikan kelangsungan perkhidmatan dan rawatan kepada pesakit bukan COVID-19 tidak terjejas, KKM telah mengadakan kerjasama dengan perkhidmatan kesihatan swasta melalui penyumberluaran perkhidmatan klinikal. Terdapat enam (6) buah hospital di Sabah yang terlibat dengan penyumberluaran perkhidmatan

perubatan ke 7 buah hospital swasta di Sabah yang meliputi disiplin-disiplin berikut:

- a) Paediatric Cardiology*
- b) Paediatric Surgery*
- c) Vascular Surgery*
- d) Gynaecology*
- e) Hepatobiliary Surgery*
- f) Orthopedic*
- g) Urology*
- h) Cardiology*
- i) Ophthalmology*
- j) Cardiothoracic Surgery*
- k) Neurosurgery*
- l) Radiology*

5. Sebanyak 1151 kes pembedahan dan prosedur telah dikenalpasti untuk dijalankan oleh hospital swasta terlibat. Proses penyumberluaran ini dijalankan secara berperingkat mengikut keperluan dan kemampuan semasa kementerian, berdasarkan kriteria kes yang telah dipersetujui di antara pihak KKM dan pihak swasta. Setakat 12 November 2020, sebanyak 276 kes (24%) dari 1151 kes seperti Vascular Surgery, Radiology, Ophthalmology dan Gynaecology telah dilaksanakan di hospital swasta. Nilai yang telah dibelanjakan setakat ini adalah RM 1,131,844.32

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : **LISAN**

DARIPADA : **TUAN KARUPAIYA A/L MUTUSAMI
[PADANG SERAI]**

TARIKH : **30 NOVEMBER 2020 (ISNIN)**

SOALAN

Minta **MENTERI PENGANGKUTAN** menyatakan tentang langkah yang telah dan akan dijalankan dalam menjamin kebajikan pemandu teksi terutama disebabkan pandemik COVID-19 yang melanda negara.

JAWAPAN

Yang Di-Pertua,

1. Untuk makluman Yang Berhormat, pihak Kerajaan telah melaksanakan pelbagai usaha untuk membantu semua pemandu kenderaan pengangkutan awam termasuk pemandu-pemandu teksi yang terkesan akibat pandemik COVID-19.
2. Antara inisiatif yang telah dilaksanakan adalah inisiatif yang telah diumumkan oleh Kerajaan pada 27 Mac 2020 mengenai Pakej PRIHATIN. Pakej ini bertujuan membantu semua rakyat yang terkesan dengan penularan wabak COVID-19. Antara bantuan yang diumumkan adalah bantuan tunai secara *one-off* sebanyak RM600 kepada pemandu teksi.

3. Selain daripada itu, Bantuan Khas SarawakKu Sayang (BSKK) iaitu bayaran bantuan *one-off* RM 600 kepada pemandu teksi di Sarawak di mana pembayaran diuruskan oleh Kementerian Pengangkutan Sarawak.
4. Selain itu mengambil kira cabaran yang dihadapi oleh pemandu-pemandu bagi menjana pendapatan dalam suasana semasa, Kementerian Pengangkutan juga telah memberi kebenaran khas kepada semua kenderaan perkhidmatan awam, tambahan satu tahun secara automatik kepada had usia maksima untuk didaftarkan atau penggantian, tertakluk kepada kelulusan pemeriksaan PUSPAKOM kenderaan tersebut.
5. Ini bermakna, mana-mana kenderaan perkhidmatan awam termasuk terksi atau e-hailing, yang telah mencapai had usia maksima untuk didaftarkan dalam tahun 2020 (iaitu dalam tempoh PKP) dan perlu diganti, akan diberikan tambahan satu tahun lagi secara automatik. Dengan pemberian tambahan had usia automatik satu tahun ini, semua pengusaha dan pemilik dapat menangguhkan penggantian kenderaan terbabit untuk satu tahun lagi.
6. Setiap pemandu teksi di Negeri Sarawak pula dibenarkan memohon permohonan Luas Kawasan Operasi (KOP) bagi beroperasi di seluruh Negeri Sarawak untuk tempoh setahun.
7. Kelulusan Rang Undang-undang (RUU) Langkah-Langkah Sementara Bagi Mengurangkan Kesan Penyakit Koronavirus 2019 (COVID-19) 2020 yang telah diluluskan juga akan membantu semua pemandu kenderaan pengangkutan awam dan barangan termasuk pemandu teksi untuk menjana pendapatan tambahan dengan kebenaran untuk menyediakan perkhidmatan lain seperti penghantaran barang/*parcel* sekiranya tidak membawa penumpang. Kelulusan sementara ini hanyalah untuk sepanjang tempoh PKP berkuatkuasa dan bertujuan mewujudkan ruang-ruang tambahan kepada pemandu terlibat untuk mendapatkan pendapatan mereka.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 30 NOVEMBER 2020 (ISNIN)

SOALAN

DATUK MOHD. AZIS BIN JAMMAN [SEPANGGAR] minta **MENTERI KESIHATAN** menyatakan adakah Kementerian bercadang untuk membina sebuah hospital pakar jantung di Sabah serta anggaran kos yang terlibat.

JAWAPAN

Tuan Yang di Pertua,

1. Perkhidmatan bagi rawatan jantung di Negeri Sabah telah pun sedia ada bermula pada tahun 2009 di Hospital Queen Elizabeth II (HQE II), Kota Kinabalu. **Kini, hospital ini merupakan Pusat Perkhidmatan Jantung bagi Negeri Sabah.**

2. Sehingga kini, perkhidmatan jantung di HQE II disediakan oleh **dua (2) orang Pakar Kardiologi, seorang Pakar Pediatrik Kardiologi, seorang Pakar Bedah Kardiotorasik dan dua (2) orang Pakar Kardiak Anestesiologi dan Perfusi.** Hospital ini akan menerima seorang lagi Pakar Bedah Kardiotorasik dalam masa terdekat. Selain itu, HQE II juga mempunyai kemudahan seperti **dua (2) dewan bedah khusus untuk pembedahan kardiotorasik dan satu (1) Makmal Invasif Kardiologi (Invasive Cardiology Lab - ICL) bagi rawatan invasif tanpa pembedahan kepada pesakit jantung.** Terdapat juga perancangan

untuk **menambah satu (1) lagi Makmal Invasif Kardiologi** di pusat ini bagi menampung beban kerja dan pertambahan pesakit jantung terutama yang memerlukan rawatan invasif.

3. Bagi memastikan akses perkhidmatan ini dapat diberikan kepada seluruh rakyat di negeri Sabah, perkhidmatan ini dijalankan melalui inisiatif kluster di mana, hospital-hospital lain turut menerima akses dan mendapat perkhidmatan lawatan pakar kardiologi secara tetap dan berkala. Tambahan juga, HQE II turut menyediakan perkhidmatan jantung kepada penduduk dari Wilayah Persekutuan Labuan, Miri dan Lawas, Sarawak.

4. Buat masa ini, KKM **tidak mempunyai perancangan untuk membina sebuah hospital pakar jantung di Sabah dalam masa terdekat**. Sekiranya terdapat cadangan membina pusat perkhidmatan jantung yang baharu, anggaran kos pembinaan adalah melibatkan sekurang-kurangnya RM 400 juta iaitu menyamai kos pembinaan Pusat Jantung Sarawak (PJS) yang beroperasi sejak tahun 2011 dengan berkapasiti 128 katil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB DR. KELVIN YII LEE WUEN
[BANDAR KUCHING]**

TARIKH : 30 NOVEMBER 2020 (ISNIN)

SOALAN

DR. KELVIN YII LEE WUEN [BANDAR KUCHING] minta **MENTERI SUMBER MANUSIA** menyatakan sama ada Kerajaan bercadang untuk meminda peraturan SOSCO untuk membolehkan pekerja yang mempunyai jaminan insurans tersebut boleh mendapat perlindungan untuk rawatan awal penyakit kanser, bukan sahaja perlu tunggu sehingga tahap IV.

JAWAPAN

Tuan Yang di-Pertua,

1. Untuk makluman Ahli-Ahli Dewan Yang Mulia ini, tuntutan faedah PERKESO bagi mereka yang menghadapi **penyakit kanser tanpa mengira tahap** boleh dibuat di bawah Skim Keilatan. PERKESO akan merujuk setiap permohonan Pencen Ilat Orang Berinsurans ke Jemaah Doktor / Jemaah Doktor Rayuan untuk **pengesahan keilatan**.
2. Rawatan bagi penyakit kanser disediakan sebagai **suatu faedah perubatan** jika disahkan **sebagai penyakit khidmat** sepertimana ditafsirkan di bawah Akta Keselamatan Sosial Pekerja 1969.
3. Berhubung cadangan YB Kuching untuk meminda peraturan PERKESO bagi membolehkan pekerja mendapat rawatan awal penyakit kanser, Kementerian mengambil maklum dan akan membuat penelitian lanjut seperti yang disarankan. Pada masa ini Kementerian menerusi PERKESO sedang membuat kajian menyeluruh untuk membuat penambahbaikkkan terhadap Akta 4 sedia ada termasuk perluasan liputan dan faedah kepada Orang berinsurans.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN WILLIAM LEONG JEE KEEN [SELAYANG]

TARIKH : 30 NOVEMBER 2020 (ISNIN)

SOALAN

TUAN WILLIAM LEONG JEE KEEN [SELAYANG] minta **MENTERI ALAM SEKITAR DAN AIR** menyatakan jumlah bahan buangan berbahaya terjadual yang dihasilkan di Malaysia setiap hari, kapasiti kemudahan-kemudahan bersepadu berlesen untuk dilupuskan dan strategi Kerajaan untuk menguruskan sisa berbahaya terjadual tersebut.

JAWAPAN

Tuan Yang Di-Pertua,

1. Di bawah Peraturan 9 (5), Peraturan-Peraturan Kualiti Alam Sekitar (Buangan Terjadual) 2005, pengeluar buangan boleh menstor buangan terjadual yang dikeluarkan olehnya selama 180 hari atau kurang selepas pengeluarannya dengan syarat bahawa kuantiti buangan terjadual yang dikumpulkan di tapak hendaklah tidak melebihi 20 metrik tan.
2. Penjanaan buangan terjadual bergantung kepada operasi yang sedang berlaku di dalam premis. Jabatan Alam Sekitar boleh menyemak kuantiti buangan terjadual yang dijana oleh industri melalui transaksi Nota Konsainan yang dikemukakan menurut Jadual Keenam, Peraturan 12(1), Peraturan-Peraturan Kualiti Alam Sekeliling (Buangan Terjadual) 2005 yang dilakukan melalui sistem *Electronic Scheduled Waste Information System* (eSWIS). Sehingga 31 Oktober 2020, sebanyak 22,514 daripada 25,696 buah premis

bersamaan dengan 87.6% yang berstatus operasi yang tertakluk di bawah Peraturan-Peraturan Kualiti Alam Sekeliling (Buangan Terjadual) 2005 telah berdaftar dengan sistem eSWIS.

3. Sehingga kini, Jabatan Alam Sekitar telah melesenkan sebanyak 406 premis yang ditetapkan buangan terjadual bagi tujuan pengolahan, pemerolehan kembali atau pelupusan buangan terjadual. Kapasiti buangan terjadual yang boleh diterima oleh premis yang ditetapkan buangan terjadual merujuk kepada teknologi pemprosesan yang diluluskan di dalam laporan Penilaian Kesan Kepada Alam Sekeliling (EIA), kelulusan Kebenaran Bertulis di bawah Seksyen 19, Akta Kualiti Alam Sekeliling 1974 dan disyaratkan di dalam syarta lesen di bawah Seksyen 18, Akta Kualiti Alam Sekeliling 1974. Penerimaan buangan terjadual di premis yang dilesenkan oleh Jabatan Alam Sekitar bergantung kepada ciri buangan terjadual (*waste characteristic*) yang dijana oleh pengeluar buangan dan kriteria penerimaan buangan (*waste acceptance criteria*) premis yang ditetapkan buangan terjadual.

4. Jabatan Alam Sekitar sedang memperkasakan urus tadbir pengurusan buangan terjadual yang dijana oleh industri melalui sistem eSWIS. Pemantauan berterusan melalui pelaporan secara harian nota konsainan berstatus "submitted", pelaporan secara mingguan penstoran melebihi 180 hari atau 20 metrik tan dan pelaporan secara bulanan industri yang tidak mengemaskini inventori dalam bulan semasa. Siasatan akan dijalankan ke atas pelaporan tersebut dan tindakan di bawah Akta Kualiti Alam Sekeliling 1974 dan peraturan-peraturan di bawahnya akan diambil ke atas salahlaku yang telah dilakukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB DATUK SERI PANGLIMA MADIUS TANGAU
(TUARAN)**

TARIKH : 30 NOVEMBER 2020 (SELASA)

SOALAN

DATUK SERI PANGLIMA MADIUS TANGAU [TUARAN] minta **MENTERI DALAM NEGERI** menyatakan tindakan yang telah dan akan diambil ke atas keterangan oleh Jabar Khan seperti yang terkandung dalam hansard Parlimen 26 Februari 2007 bahawa UMNO Sabah terlibat memberi kad pengenalan biru kepada PTI dan menjadikan mereka pengundi.

JAWAPAN

Tuan Yang Di-Pertua,

Kerajaan telah menubuhkan Suruhanjaya Siasatan Pendatang Asing di Sabah (RCI) pada 06 September 2012 dan antara peranan Suruhanjaya adalah untuk menyiasat berhubung pemberian kad pengenalan biru kepada pendatang asing tanpa izin (PATI) di Sabah dengan mengambil keterangan saksi namun tidak tertakluk kepada pemeriksaan balas. Justeru, dakwaan bahawa terdapat kad pengenalan yang diberikan kepada PATI adalah merujuk kepada kad pengenalan yang diperoleh dengan cara yang mencurigakan atau dikeluarkan secara tidak teratur oleh sindiket dan orang yang tidak bertanggungjawab, sebagaimana yang dibangkitkan oleh saksi-saksi dari kalangan ahli politik, penulis, wartawan dan orang awam di dalam prosiding RCI.

Dalam hal ini, Kementerian Dalam Negeri (KDN) melalui Jabatan Pendaftaran Negara (JPN) telah melaksanakan semakan semula dan siasatan termasuk memanggil semula pemegang Kad Pengenalan yang disyaki dikeluarkan secara tidak teratur dan tidak sah. Proses semakan ini dilaksanakan secara berterusan dan Kad Pengenalan yang dikeluarkan secara tidak teratur telah dibatalkan atas beberapa sebab antara lainnya sebab kematian, tidak hadir untuk siasatan atau permohonan dibatalkan kerana tidak memenuhi syarat kelayakan mengikut perundangan yang berkuat kuasa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : YB PUAN KASTHURIRAANI A/P PATTO
(BATU KAWAN)**

TARIKH : 30 NOVEMBER 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta **MENTERI DALAM NEGERI** menyatakan bilangan kanak-kanak sama ada bersama ibu bapa atau penjaga atau bersendirian mengikut pecahan Pusat Tahanan Imigresen atau Depot Imigresen di semua negeri sehingga kini dan apakah status komitmen Kerajaan *kepada Alternative to Detention* yang telah dipersetujui sebelum ini.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) sedang meneliti kaedah alternatif bagi memastikan kesejahteraan tahanan kanak-kanak di Depot Tahanan Imigresen. Bagi merealisasikan hasrat ini, KDN bersama-sama Kementerian Pembangunan Wanita, Keluarga dan Masyarakat (KPWKM) dalam usaha untuk melaksanakan projek rintis *Alternative to Detention* (ATD) secara berperingkat yang disasarkan kepada tahanan kanak-kanak bertujuan melihat kebolehlaksanaan perkara ini di Malaysia.

Projek rintis yang dirangka ini akan melibatkan kerjasama antara Jabatan Kebajikan Masyarakat (JKM) dan Jabatan Imigresen Malaysia (JIM) sebagai agensi pelaksana serta turut dibantu oleh Pertubuhan Bukan Kerajaan (NGO).

Untuk makluman Ahli Yang Berhormat juga, sehingga 26 Oktober 2020, seramai 756 orang kanak-kanak berada di dalam Depot Imigresen di seluruh negara. Daripada jumlah berkenaan, seramai 351 kanak-kanak adalah dengan ibu bapa atau penjaga manakala baki seramai 405 kanak-kanak adalah tanpa penjaga.

Jumlah tahanan kanak-kanak dengan penjaga yang paling ramai adalah di Depot Tahanan Imigresen Bekenu, Sarawak iaitu seramai 107 orang, diikuti oleh Depot Tahanan Imigresen Belantik, Kedah iaitu seramai 54 orang dan Depot Tahanan Imigresen Bukit Jalil, Kuala Lumpur iaitu seramai 51 orang. Manakala, bagi tahanan kanak-kanak tanpa penjaga, JIM merekodkan jumlah tertinggi di Depot Tahanan Imigresen Belantik, Kedah iaitu seramai 113 orang, diikuti oleh Depot Tahanan Imigresen Tanah Merah, Kelantan iaitu seramai 73 orang dan Depot Tahanan Imigresen Bukit Jalil, Kuala Lumpur iaitu seramai 70 orang.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE TIGA,
PARLIMEN KEEMPATBELAS**

PERTANYAAN : JAWAB LISAN

**DARIPADA : TUAN RAMKARPAL SINGH A/L KARPAL SINGH
(BUKIT GELUGOR)**

TARIKH : 30 NOVEMBER 2020

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI DALAM NEGERI** menyatakan sama ada Kerajaan akan memansuhkan atau meminda Akta Hasutan, 1948 dan sekiranya tidak sama ada akta tersebut akan dipinda untuk sekurang-kurangnya mengiktirafkan niat (intention) tertuduh sebagai satu pembelaan.

JAWAPAN

Tuan Yang Di Pertua,

Kementerian Dalam Negeri berpandangan undang-undang sedia ada termasuk Akta Hasutan 1948 adalah mencukupi bagi menyedarkan pesalah-pesalah yang melakukan kesalahan-kesalahan yang melibatkan sensitiviti kaum dan agama. Ia juga mampu bertindak sebagai satu bentuk *deterrent* kepada rakyat Malaysia supaya tidak mempersendakan isu sensitif seperti ini. Walau bagaimanapun, Kementerian Dalam Negeri dari semasa ke semasa mengkaji perundangan tersebut untuk ditambahbaik.

Selain itu, pihak polis juga akan terus melakukan pemantauan ke atas penyebaran maklumat dan tindakan segera akan diambil sekiranya terdapat elemen yang melibatkan sensitiviti kaum dan agama. Ini kerana, isu-isu sensitif tersebut boleh menjejaskan ketenteraman dan keharmonian rakyat jika tidak dibendung.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN KHALID BIN ABD SAMAD [SHAH ALAM]

TARIKH : 30 NOVEMBER 2020 (ISNIN)

SOALAN

TUAN KHALID BIN ABD SAMAD [SHAH ALAM] minta **MENTERI WILAYAH PERSEKUTUAN** menyatakan apakah usaha-usaha Kementerian mengenai rumah PPAIM Melinjau, Presint 11J Putrajaya yang telah siap, tapi tidak sesuai diduduki oleh penduduk mahupun pembeli dan masalah parkir yang belum selesai.

JAWAPAN

Tuan Yang Di Pertua,

Untuk makluman Yang Berhormat Shah Alam, Perumahan Perkhidmatan Awam (PPAM) Melinjau terdiri daripada 650 unit rumah dengan harga jualan maksimum RM260,000 seunit.

Pembangunan ini telah diserahkan kunci kepada pembeli pada 4 Ogos 2019. Tempoh tanggungan kecacatan (DLP) bagi projek ini akan berakhir pada 28 Julai 2021. Ini bermakna projek ini masih lagi dalam tempoh tanggungan kecacatan selama 2 tahun dari tarikh serahan pemilikan kosong (VP).

Untuk makluman Ahli-ahli Yang Berhormat, Kementerian Wilayah Persekutuan (KWP) melalui Perbadanan Putrajaya (PPj) akan meneliti secara menyeluruh ke atas isu kecacatan yang meliputi aspek-aspek berikut:-

- 1) Kecacatan kerja bagi unit kediaman;
- 2) Kecacatan kerja di kawasan awam; dan
- 3) Kebimbangan ke atas struktur bangunan yang berkemungkinan memberi kesan terhadap keselamatan bangunan.

PPj bersama pembeli telah menjalankan lawatan pemeriksaan bersama dan menyenaraikan semua kecacatan-kecacatan meliputi perkara-perkara di atas. Laporan kajian tersebut telah disiapkan dan kerja-kerja pembaikan akan dibuat berdasarkan kepada laporan kecacatan tersebut.

PPj telah mengadakan 8 siri mesyuarat bersama pihak Kementerian Perumahan dan Kerajaan Tempatan (KPKT) dan terakhir telah diadakan pada 14 Oktober 2020. Keputusan telah dibuat supaya pihak KPKT menyalurkan dana kepada pemaju secara berperingkat sebaik sahaja kerja-kerja pembaikan kecacatan siap dilaksanakan.

PPj akan memperakukan kerja-kerja pembaikan kecacatan yang telah mematuhi spesifikasi melalui pemantauan yang ketat.

PPj juga telah meminta pihak JKR membuat pemeriksaan forensik bangunan bagi menilai kestabilan ke atas bangunan tersebut yang telah dijalankan pada 22 Oktober 2020. Hasil pemeriksaan awalan mendapati kualiti kerja kemas adalah teruk. Laporan terperinci akan dikemukakan oleh JKR dalam masa terdekat. Ini bagi memberi tahap kepuasan hati penduduk berkaitan struktur keselamatan bangunan.

Sebagai tambahan, PPj akan memperuntukkan sejumlah RM2 juta bagi penyediaan Tempat Letak Kereta (TLK) tambahan sebanyak 1,433 TLK keseluruhannya untuk penduduk-penduduk PPAM di Putrajaya termasuk PPAM Melinjau. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KE-EMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 30 NOVEMBER 2020 (ISNIN)

SOALAN

Minta **MENTERI PENGANGKUTAN** menyatakan jumlah subsidi yang telah disalurkan kepada inisiatif 'Pas MY30 tanpa had' untuk pengangkutan awam di Lembah Klang setiap bulan sejak dilaksanakan sehingga kini.

JAWAPAN

Yang di-Pertua,

1. Untuk makluman Yang Berhormat, program pas My30 merupakan satu program jangka pendek yang telah diumumkan oleh YAB Perdana Menteri pada 5 Jun 2020 menerusi Program Pelan Jana Semula Ekonomi Negara (PENJANA). Inisiatif ini akan membolehkan pengguna membayar RM30 sahaja sebulan untuk menikmati pas perjalanan tanpa had bagi pengangkutan awam di bawah seliaan Prasarana di Lembah Klang. Inisiatif ini hanya terbuka kepada rakyat Malaysia untuk tempoh mulai 15 Jun 2020 sehingga 31 Disember 2020. Program sementara ini diperkenalkan antara lain bertujuan menjana pemulihan semula ekonomi susulan pandemik Covid-19 dan mengurangkan beban kewangan yang dialami oleh orang ramai.

2. Jualan dan subsidi Kerajaan bagi program MY30 adalah seperti jadual di bawah :

| Bulan | Pas Perjalanan MY30/Subsidi Kerajaan | |
|----------------|---|----------------------|
| | Unit | RM |
| Jun 2020 | 77,133 | 13,112,610.00 |
| Julai 2020 | 124,987 | 21,247,790.00 |
| Ogos 2020 | 136,036 | 23,126,120.00 |
| September 2020 | 150,000 | 25,500,000.00 |
| Jumlah | 488,156 | 82,986,520.00 |

3. Dalam tempoh pelaksanaan program pas My30 ini sehingga September 2020 jualan MY30 adalah sebanyak 488,156 di mana dapat dilihat peningkatan bulanan yang positif dan orang ramai menyambut baik inisiatif Kerajaan dalam membantu rakyat bagi meneruskan kelangsungan hidup dengan melanggan My30. Pelaksanaan Program ini dapat meningkatkan penggunaan pengangkutan awam sebagai mod utama pilihan rakyat dalam kehidupan seharian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN [LABUAN]

TARIKH : 30 NOVEMBER 2020 (ISNIN)

SOALAN

DATUK ROZMAN BIN ISLI [LABUAN] minta **MENTERI WILAYAH PERSEKUTUAN** menyatakan adakah Kementerian sedar bahawa Labuan mencatatkan kadar penghuni setingga tertinggi dalam negara. Ianya merupakan bom jangka bagi penyakit berjangkit di Pulau Labuan. Apakah Perancangan pihak Kementerian untuk memastikan Wilayah Persekutuan Labuan yang kecil itu menjadi bebas setingga.

JAWAPAN

Tuan Yang Di Pertua,

Untuk makluman Yang Berhormat Labuan, berdasarkan tafsiran Dewan Bahasa dan Pustaka, definisi setinggan merupakan penempatan di atas tanah Kerajaan secara haram. Kementerian amat prihatin dengan isu setinggan.

Untuk makluman Ahli-Ahli Yang Berhormat, jumlah penduduk semasa di Wilayah Persekutuan Labuan adalah berjumlah 103,135 orang. Wilayah Persekutuan Labuan mempunyai kepadatan penduduk seramai 10.29 per hektar dengan purata saiz isi rumah iaitu 4.62 orang bagi setiap rumah. Berdasarkan maklumat setinggan daripada Kementerian Perumahan dan kerajaan Tempatan pada tahun 2014, terdapat seramai 970 keluarga direkodkan yang mana sebahagiannya melibatkan penempatan di Pangkalan Kapor. Walau bagaimanapun, perkara ini telah lama diselesaikan dengan pemindahan semula penduduk yang terlibat.

Suka saya menjelaskan bahawa Wilayah Persekutuan Labuan mempunyai beberapa skim penempatan bagi pelarian UNHCR dan merupakan pemegang IMM13. Untuk makluman, Kawasan penempatan skim ini telahpun di tentukan oleh agensi Kerajaan yang bertanggungjawab iaitu Majlis Keselamatan Negara yang mana melibatkan tanah-tanah Kerajaan di Kiamsam dan Kg. Muslim di Kg. Batu Arang. Justeru, isu dan kawalan membabitkan penempatan ini hendaklah dirujuk kepada agensi tersebut. Tidak dinafikan juga terdapat beberapa penempatan yang tidak dirancang melibatkan tanah persendirian dan swasta seperti di Kampung Saguking/ Gersik yang mana pemilik tanah menyedari perkara ini dan masih dalam perancangan untuk menyelesaikan penempatan tersebut.

Bagi menangani isu setinggan di Wilayah Persekutuan Labuan, kerjasama agensi diperlukan agar ianya diselesaikan secara kolektif dan menyeluruh. Antara agensi yang memainkan peranan dan tanggungjawab adalah seperti Majlis Keselamatan Negara (MKN), Polis DiRaja Malaysia

(PDRM), Perbadanan Labuan (PL), Jabatan Imigresen, Pejabat Tanah dan Galian, Jabatan Pengairan dan Saliran, Jabatan Alam Sekitar, Jabatan Kesihatan dan lain-lain agensi yang berkaitan.

Bagi tujuan kawalan penempatan haram di atas tanah Kerajaan, Perbadanan Labuan bersama agensi berkaitan sentiasa melaksanakan aktiviti pemantauan berterusan agar tidak ada pencerobohan dan penempatan haram diadakan. Tanah-tanah Kerajaan yang berpotensi akan dimohon oleh agensi berkaitan untuk melaksanakan projek pembangunan, kemudahan awam dan infrastruktur atau pengekalan sebagai Kawasan hijau yang diwartakan.

Bagi penempatan yang melibatkan tanah individu dan swasta, Perbadanan Labuan akan sentiasa membantu pihak tersebut jika diperlukan. Bagi program pemindahan dan penempatan semula, pihak Kerajaan akan mengenalpasti perumahan-perumahan sedia ada, sedang dibina dan dalam perancangan yang boleh ditawarkan kepada penduduk yang layak.

Selain itu, skim penempatan sedia ada perlu ditambah baik dari segi persekitaran di bawah seliaan agensi yang bertanggungjawab agar tidak menimbulkan isu kesihatan dan keselamatan pada masa akan datang.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 30 NOVEMBER 2020 (ISNIN)

SOALAN

TUAN NOOR AMIN BIN AHMAD [KANGAR] minta **MENTERI KESIHATAN** menjelaskan apakah asas yang diguna pakai untuk membenarkan pelepasan kuarantin wajib 14 hari di pusat kuarantin bagi mereka yang pulang dari luar negara.

JAWAPAN

Tuan Yang di-Pertua,

1. Gelombang kedua Pandemik COVID-19 di Malaysia mula berlaku pada awal bulan Mac 2020. Mengambil kira kejadian kes COVID-19 yang tinggi di luar negara, sidang Majlis Keselamatan Negara (MKN) telah memutuskan untuk mewajibkan semua pengembara yang pulang dari luar negara (pengembara) menjalani kuarantin selama 14 hari di stesen-stesen kuarantin.
2. Walau bagaimanapun, terdapat sebilangan kecil pengembara ini yang memohon untuk **dikecualikan daripada kuarantin di stesen** kuarantin yang disediakan. Ketua Pengarah Kesihatan Malaysia boleh memberi pertimbangan terhadap permohonan seperti ini. Walaubagaimana pun **pengembara ini masih wajib menjalani pengawasan dan pemerhatian di kediaman sendiri** (*Home Surveillance*), yang mana perintah pemantauan ini (*Home Surveillance*)

Order) termaktub di bawah Seksyen 15, Akta Pencegahan dan Pengawalan Penyakit Berjangkit, 1988 (Akta 342).

3. Kriteria untuk diberi kelonggaran dari menjalani kuarantin di stesen kuarantin yang disediakan ini termasuk:

- a) **Isu kesihatan termasuk mengalami kesihatan mental dan penyakit psikiatri** yang dibuktikan dengan pelaporan daripada doktor atau pakar perubatan serta justifikasi penilaian kesihatan oleh petugas kesihatan di pintu masuk negara;
- b) **Pesakit yang memerlukan rawatan segera dan telah mempunyai tarikh termujanji dengan hospital swasta** tertentu (*Malaysia Health Tourism Council (MHTC) Programme*). Pesaki-pesakit seperti ini perlu terus dimasukkan ke hospital berkaitan dan wajib menjalani kuarantin selama 14 hari di hospital tersebut.
- c) **Kanak-kanak di bawah umur 16 tahun** yang mengembara bersendirian.
- d) **Pengembara yang berumur melebihi 70 tahun** serta tidak dapat menguruskan diri sendiri;
- e) **Wanita yang mengandung di fasa akhir kehamilannya** (38 minggu ke atas);
- f) **Duta-duta negara asing** yang mendapat pengesahan daripada Kementerian Luar Negeri selaku seorang duta dan berdasarkan kelulusan Jabatan Imigresen Malaysia (JIM); dan
- g) **Pakar-pakar teknikal luar negara** yang datang untuk membaik pulih mesin-mesin atau peralatan di industri tertentu dan akan berada di Malaysia dalam masa kurang dari seminggu, berdasarkan kelulusan Jabatan Imigresen Malaysia (JIM).

Tuan Yang di-Pertua,

4. Pengembara yang diberi kelonggaran untuk pemantauan dan pengawasan di kediaman sendiri ini masih perlu dan wajib mematuhi syarat-syarat berikut:

- a) **Memuat-turun dan mengaktifkan aplikasi MySejahtera;**
- b) **Menjalani swab ujian COVID-19 (RT-PCR) di pintu masuk negara;**
- c) **Diberi *Home Surveillance Order* dan dipakaikan gelang pengawasan (*wristband*).** Jika gagal mematuhi perintah ini dan didapati merayau keluar dari kediaman masing-masing, pengembara ini boleh diambil tindakan undang-undang di bawah peraturan 11(1) Peraturan-peraturan Pencegahan dan Pengawalan Penyakit Berjangkit (Langkah-langkah di dalam Kawasan Tempatan Jangkitan) (No. 8) (2020);
- d) **Berada di kediaman sendiri selama 14 hari;**
- e) **Memantau gejala dan kesihatan sendiri** menggunakan *Home Assessment Tools* (HAT) dalam aplikasi MySejahtera;
- f) **Menjalani ujian COVID-19 kedua (RTK Ab) pada hari ke 13 (D13) di klinik kesihatan berhampiran;**
- g) Jika keputusan **ujian RTK Ab negatif, gelang pengawasan akan dipotong dan diberikan *Release Order* pada hari ke 14 (D14)** oleh PKD berhampiran dengan kediaman pengembara ini; dan
- h) **Sekiranya ujian RTK Ab positif, ujian Rt-PCR** akan dijalankan ke atas individu tersebut. Manakala ahli keluarga akan dilakukan saringan.

Sekian, terima kasih.